

南
史

三



梁本紀中第七

南史七

李

延壽

普通元年春正月乙亥朔大赦改元丙子日有蝕之己卯
以司徒臨川王宏為太尉楊州刺史以金紫光祿大夫王
份為尚書左僕射庚子扶南高麗等國並遣使朝貢二月
癸丑以高麗王嗣子安為寧東將軍高麗王三月滑國遣
使朝貢夏四月河南國遣使朝貢秋七月己卯江淮海並
溢九月乙亥有星晨見東方光爛如火是歲魏正光元年
二年春正月辛巳祀南郊詔置孤獨園以恤孤幼戊子大
赦二月辛丑祀明堂三日庚寅大雪平地三尺夏四月乙

卯改作南北郊丙辰詔曰平秩東作義不在南前代因襲有乖禮制可於震方具茲千畝於是徙藉田於東郊外十五里五月癸卯琬琰殿火延燒後宮屋三千間閏月丁巳詔自今可停賀瑞六月丁卯義州刺史文僧明以州歸魏秋七月丁酉假大匠卿裴邃節督衆軍侵魏甲寅魏荊州刺史桓叔興帥衆降八月丁亥始平郡石鼓村地自開成井方六尺六寸深三十二丈冬十一月百濟新羅國各遣使朝貢十二月戊辰以鎮東大將軍百濟王餘隆為寧東大將軍

三年春正月庚子以吳郡太守王暕為尚書左僕射庚戌

都下地震三月乙卯巴陵王蕭屏薨夏四月丁卯汝陰王
劉端薨五月壬辰朔日有蝕之既癸巳大赦詔公卿百僚
各上封事連率郡國舉賢良方正直言之士秋八月甲子
婆利白題國各遣使朝貢冬十一月甲申開府儀同三司
始興王憺薨

四年春正月辛卯祀南郊大赦辛亥祀明堂二月乙亥耕
籍田孝弟力田賜爵一級豫耕之司尅日勞酒冬十月庚
午以中衛將軍袁昂為尚書令即本號開府儀同三司十
一月癸未朔日有蝕之甲辰尚書左僕射王暕卒十二月
戊午用給事中王子雲議始鑄鐵錢狼牙脩國遣使朝貢

五年夏六月乙酉龍鬬于曲阿王陂因西行至建陵城所
經樹木倒折開數十丈庚子以負外散騎常侍元樹為平
北將軍北青兗二州刺史率衆侵魏

六年春正月辛亥祀南郊大赦庚申魏徐州刺史元法僧
以彭城來降自去歲以來北侵諸軍所在剋獲甲戌以元
法僧為司空封始安郡王二月辛巳改封法僧為宋王三
月丙午賜新附人長復除註誤罪失一無所問夏五月己
酉脩宿豫堰又脩曹公堰於濟陰壬子遣中護軍夏侯亶
督壽陽諸軍侵魏六月庚辰豫章王綜奔魏魏復據彭城
秋七月壬戌大赦冬十二月壬辰都下地震是歲魏孝昌

元年

七年春正月辛丑朔赦死罪以下夏四月乙酉太尉臨川王宏薨南州建改置校尉增加奉秩詔在位群臣各舉所知凡是清吏咸使薦聞秋九月己酉荊州刺史鄱陽王恢薨冬十一月庚辰丁貴嬪薨大赦是歲河南高麗林邑滑國並遣使朝貢

大通元年春正月乙丑以尚書右僕射徐勉為尚書左僕射詔百官奉祿自今可長給見錢辛未祀南郊詔流亡者聽復宅業蠲役五年尤貧家勿收今年三調孝弟力田賜爵一級是月司州刺史夏侯夬進軍三關所至皆剋初帝

創同泰寺至是開大通門以對寺之南門取反語以協同
泰自是晨夕講義多由此門三月辛未幸寺捨身甲戌還
宮大赦改元大通以符寺及門名夏五月丙寅成景雋尅
魏臨潼竹邑冬十月庚戌魏東豫州刺史元慶和以渦陽
內屬甲寅曲赦東豫州十一月丁卯以中護軍蕭藻為都
督侵魏鎮于渦陽是歲林邑師子高麗等國各遣使朝貢
二年春正月乙酉蠕蠕國遣使朝貢二月築寒山堰癸丑
魏孝明皇帝崩夏四月戊戌魏尒朱榮推奉孝莊帝庚子
榮殺幼主及太后胡氏辛丑魏郢州刺史元願達以義陽
降封願達為樂平王是時魏大亂其北海王顥臨淮王彧

汝南王悅並來奔北青州刺史元儁南荊州刺史李志皆
以地降冬十月丁亥以魏北海王顥主魏遣東宮直閣將
軍陳慶之衛送還北魏衛州刺史鄧猷以地降是歲魏武
泰元年尋改為建義又改曰永安

中大通元年春正月辛酉祀南郊大赦賜孝悌力田爵一
級辛巳祀明堂夏四月癸巳陳慶之攻拔魏梁城進屠考
城禽魏濟陰王暉業五月癸酉進尅虎牢魏孝莊帝出居
河北乙亥元顥入京師僭號建武六月壬午以求興公主
疾篤故大赦公主志也是月都下疫甚帝於重雲殿為百
姓設救苦齋以身為禱閏月護軍將軍南康王績薨己卯

魏將尔朱榮攻殺元顥京師反正秋九月辛巳朱雀航華表災癸巳幸同泰寺設四部無遮大會上釋御服披法衣行清淨大捨以便省為房素床瓦器乘小車私人執役甲午升講堂法坐為四部大衆開涅槃經題癸卯群臣以錢一億萬奉贖皇帝菩薩大捨僧衆默許乙巳百辟詣寺東門奉表請還臨宸極三請乃許帝三答書前後並稱頓首冬十月己酉又設四部無遮大會道俗五萬餘人會畢帝御金輅還宮御太極殿大赦改元十一月戊子魏巴州刺史嚴始欣以城降是歲盤盤蠕蠕國並遣使朝貢

二年夏四月癸丑幸同泰寺設平等會庚申大雨雹六月

丁巳遣魏汝南王悅還北主魏庚申以魏尚書左僕射范
遵為司州牧隨悅北侵是月林邑扶南國遣使朝貢秋八
月庚戌幸德陽堂祖魏主元悅山賊寇會稽郡縣九月壬
午假超武將軍湛海珍節以討之是歲魏莊帝殺其權臣
尔朱榮其黨奉魏廣王曄為主而殺孝莊帝年號建明
三年春正月辛巳祀南郊大赦丙申以魏尚書僕射鄭元
護為征北大將軍二月辛丑祀明堂夏四月己巳皇太子
統薨六月癸丑立昭明太子子華容公歡為豫章郡王枝
江公譽為河東郡王曲江公譽為岳陽郡王是月丹丹國
遣使朝貢秋七月乙亥立晉安王綱為皇太子大赦賜為

父後者及出處忠孝文武清勤並爵一級庚寅詔宗戚有服屬者並賜湯沐食鄉亭侯各隨遠近以為差次壬辰以吏部尚書何敬容為尚書右僕射九月狼牙脩國遣使朝貢是秋吳興生野稻飢者賴焉冬十月己酉上幸同泰寺升法坐為四部衆說涅槃經迄于乙卯前樂山縣侯蕭正則有罪流徙至是招誘亡命欲寇廣州在所討平之十一月乙未上幸同泰寺升法座為四部衆說般若經迄于十二月辛丑是歲魏劬朱兆又廢其主曄而奉節閔皇帝改建明二年為普泰元年又魏勃海王高歡舉兵信都別奉勃海太守朗為主改普泰元年為中興

四年春正月丙寅以開府儀同三司南平王偉為大司馬
以司空宋王元法僧為太尉尚書令以開府儀同三司袁
昂為司空立臨川靖惠王宏子正德為臨賀郡王庚午立
嫡皇孫大器為宣城郡王位列諸王上癸未魏南充州刺
史劉世明以城降二月壬寅以太尉元法僧還北主魏以
侍中元景隆為徐州刺史封彭城郡王通直常侍元景宗
為青州刺史封平昌郡王隨法僧北侵庚戌新除揚州刺
史邵陵王綸有罪免為庶人三月庚午侍中領國子博士
蕭子顯表置制旨孝經助教一人生十人專通帝所釋孝
經義夏四月盤盤國遣使朝貢秋七月甲辰星隕如雨九

月乙巳加司空表昂尚書令冬十一月高麗國遣使朝貢
十二月丙子魏彭城王尒朱仲遠來奔以為定洛將軍封
河南王北侵隨所尅土使自封建庚辰以太尉元法僧為
郢州刺史驃騎大將軍開府同三司之儀是歲魏相勃海
王高歡平尒朱氏廢節閔皇帝及自所奉勃海故王朗而
奉平陽王脩是為孝武皇帝改中興二年為太昌尋又改
為永熙元年

五年春正月辛卯祀南郊大赦賜孝悌力田爵一級先是
一日丙夜南郊令解滌之等到郊所履行忽聞異香三隨
風至及將行事奏樂迎神畢有神光圓滿壇上朱紫黃白

雜色食頃乃減戊申都下地震己酉長星見辛亥祀明堂
二月癸未幸同泰寺設四部大會升法坐發金字般若經
題訖于己丑三月丙辰大司馬南平王偉薨夏五月戊子
都下大水御道通船六月己卯魏建義城主蘭保殺東徐
州刺史崔祥以下邳降冬十月庚申以尚書右僕射何敬
容為左僕射以吏部尚書謝舉為右僕射是歲河南波斯
盤盤等國並遣使朝貢

六年春二月癸亥耕藉田大赦賜孝悌力田爵一級三月
己亥以行河南王可沓振為西秦河二州刺史正封河南
王甲辰百濟國遣使朝貢夏四月丁卯熒惑在南斗秋七

月甲辰林邑國遣使朝貢冬十月丁卯以信武將軍元慶和為鎮北將軍封魏王率衆北侵閏十二月丙午西南有雷聲二是歲魏孝武帝迫于其相高歡出居閼中歡又別奉清河王世子善見為主是為孝靜帝改永熙三年為天平元年魏於是始分為兩孝武既至閼中又與丞相宇文泰不平未幾遇鴆而崩

大同元年春正月戊申朔大赦改元二月辛巳祀明堂丁亥耕藉田辛丑高麗丹丹國並遣使朝貢三月丙寅幸同泰寺設無遮大會辛未滑國遣使朝貢夏四月庚子波斯國遣使朝貢壬戌幸同泰寺鑄十方銀像并設無碍會秋

七月辛卯扶南國遣使朝貢冬十月雨黃塵如雪十一月
壬戌北梁州刺史蘭欽攻漢中魏梁州刺史元羅降癸亥
復梁州是歲西魏文皇帝大統元年

二年春二月乙亥耕藉田三月庚申詔求讜言及令文武
在位舉士戊寅帝幸同泰寺設平等法會夏四月乙未以
開府同三司之儀元法僧為太尉五月癸卯以魏梁州刺
史元羅為青冀二州刺史封東郡王六月丁亥詔郊明堂
陵廟等令改視散騎侍郎秋九月辛亥幸同泰寺設四部
無尋法會冬十月乙亥詔大舉北侵壬午幸同泰寺設無
尋大會十一月雨黃塵如雪攬之盈掬己亥詔北侵衆軍

班師辛亥都下地震生白毛長二尺十二月壬申與東魏
通和

三年春正月辛丑祀南郊大赦賜孝悌力田爵一級是夜
朱雀門災壬寅雨灰黃色二月丁亥耕藉田癸巳以護軍
將軍蕭藻為尚書左僕射三月戊戌立昭明太子子警為
武昌郡王警為義陽郡王夏五月癸未幸同泰寺鑄十方
金銅像設無昇法會六月青州胸山隕霜秋七月青州雪
害苗稼癸卯東魏人來聘己酉義陽王警薨八月辛卯幸
阿育王寺設無昇法喜食大赦九月使兼散騎常侍張臯
聘于東魏閏九月甲子侍中太尉元法僧薨冬十月丙辰

都下地震是歲飢

四年春二月己亥耕籍田三月河南蠕蠕國並遣使朝貢
夏五月甲戌東魏人來聘六月辛丑日有蝕之秋七月癸
亥詔以東冶徒李胤之降象牙如來真形大赦戊辰使兼
散騎常侍劉孝儀聘于東魏八月甲辰詔南兖等十二州
既經飢饉曲赦逋租宿責勿收今年三調九月閱武于樂
游苑

五年春正月乙卯以護軍將軍廬陵王續為驃騎將軍安
右將軍尚書左僕射蕭藻為中衛將軍並開府儀同三司
中權將軍丹楊尹何敬容以本號為尚書令吏部尚書張

續為尚書左僕射丁巳御史中丞參禮儀事賀琛奏今南
北二郊及藉田往還並宜御輦不復乘路三郊請用素輦
藉田往還乘常輦皆以侍中陪乘停大將軍及太僕詔付
尚書博議施行改素輦名大同輦郊祀宗廟乘佩輦辛未
祀南郊詔孝悌力田及州閭鄉黨稱為善人者各賜爵一
級秋八月乙酉扶南國獻生犀冬十一月乙亥東魏人來
聘十二月使兼散騎常侍柳豹聘于東魏是歲都下訛言
天子取人肝以飴天狗大小相设日晚便閉門持仗數月
乃止

六年春正月庚戌朔曲赦司豫徐兗四州二月己亥耕藉

田夏四月癸未詔晉宋齊三代諸陵有職司者勤加守護
五月己卯河南王遣使朝獻馬及方物求釋迦像并經論
十四條敕付像并制旨涅槃般若金光明講疏一百三卷
秋七月丁亥東魏人來聘遣散騎常侍陸晏子報聘八月
戊午大赦辛未盤盤國遣使朝貢九月戊戌司空表昂薨
冬十一月己卯曲赦都下十二月壬子江州刺史豫章王
歡薨

七年春正月辛巳祀南郊大赦辛丑祀明堂二月乙巳以
行宕昌王梁弥泰為平西將軍河涼二州刺史正封宕昌
王辛亥耕藉田乙卯都下地震夏四月戊申東魏人來聘

遣兼散騎常侍明少遐報聘冬十一月丙子詔停所在使
役女丁十二月壬寅東魏人來聘遣兼散騎常侍表狎報
聘丙辰於宮城西立士林館延集學者是歲宕昌蠕蠕高
麗百濟滑國各遣使朝貢百濟求涅槃等經疏及醫工畫
師毛詩博士並許之交州人李賁攻刺史蕭諮

八年春正月安成郡人劉敬躬挾左道以反二月戊戌江
州刺史湘東王繹遣中兵曹子郢討禽之送于都斬之建
康市三月於江州新蔡高塘立頌平屯墾作蠻田

九年春閏正月丙申地震生毛三月以太子詹事謝舉為
尚書僕射夏四月林邑王破德州攻李賁賁將范脩又破

林邑王於九德敗走之冬十一月益州刺史武陵王紀進
號征西將軍開府儀同三司

十年春正月李貴竊號於交趾年號天德三月甲午幸蘭
陵庚子謁建陵有紫雲蔭陵上食頃乃散帝望陵流涕所
露草皆變色陵傍有枯泉至是而流水香繁辛丑哭于脩
陵壬寅於皇基寺設法會詔賜蘭陵老少位一階并加頒
賚所經縣邑無出今年租賦因賦還舊鄉詩癸卯詔園陵
職司恭事勤勞並錫位一階并加賜賚己酉幸京口城北
固樓因改名北顧庚戌幸回賓亭宴帝鄉故老及所經近
縣奉迎候者少長數千人各賚錢二千夏四月乙卯至自

蘭陵詔鰥寡孤獨尤貧者贍恤各有差五月廣州人盧子略反刺史新渝侯映討平之詔曲赦廣州秋九月己丑赦冬十一月大雪平地三尺

十一年春正月震華林園光嚴殿重雲閣帝自貶拜謝上天累刻乃止夏四月東魏人來聘冬十月己未詔復開贖罪典

中大同元年春正月丁未曲阿縣建陵隧口石辟邪起舞有大蛇鬬隧中其一被傷奔走青蟲食陵樹葉略盡癸丑交州刺史楊暕剋交趾嘉寧城李賁竄入屈獠洞交州平三月乙巳大赦庚戌幸同泰寺講金字三慧經仍施身夏

四月丙戌皇太子以下奉贖仍於同泰寺解設法會大赦
改元是夜同泰寺災六月辛巳竟天有聲如風水相薄秋
七月甲子詔自今有犯罪者非大逆父母祖父母勿坐丙
寅詔曰朝四暮三衆狙皆喜名實未虧而喜怒為用頃聞
外間多用九佰錢佰減則物貴佰足則物賤非物有貴賤
是心有顛倒至於遠方日更滋甚自今可通用足佰錢八
月丁丑東揚州刺史武昌王整薨甲午渴槃陀國遣使獻
方物冬十一月癸酉汝陰王劉哲薨

太清元年春正月己亥朔日有蝕之壬寅荊州刺史廬陵
王續薨辛酉祀南郊大赦甲子祀明堂是月東魏相勃海

王高歡薨二月己卯白虹貫日庚辰東魏司徒侯景求以河南十三州內屬壬午以景為大將軍封河南王大行臺承制如鄧禹故事丁亥耕藉田三月庚子幸同泰寺設無遮大會上釋御服服法衣行清淨大捨名曰羯磨以五明殿為房設素木牀葛帳土瓦器乘小輿私人執役乘輿法服一皆屏除甲辰遣司州刺史羊鴉仁率土州刺史桓和仁州刺史湛海珍等應接侯景兵未至而東魏遣兵攻景景又割地求救於西魏方解圍乙巳帝升光嚴殿講堂坐師子講金字三慧經捨身夏四月庚寅群臣以錢一億萬奉贖皇帝菩薩僧衆默許戊寅百辟詣鳳莊門奉表三請

三蒼頡首並如中大通元年故事丁亥服袞冕御輦還宮
幸太極殿如即位禮大赦改元是月神馬出皇太子獻寶
馬頌六月戊辰以前雍州刺史鄱陽王範為征北將軍總
督漢北征討諸軍事秋七月庚申羊鴉仁入縣弘城八月
乙丑諸軍北征以南豫州刺史蕭明為大都督赦緣邊初
附諸州戊子以大將軍侯景錄行臺尚書事九月癸卯王
游苑成輿駕幸苑冬十一月東魏將慕容紹宗大敗蕭明
于寒山明被俘執紹宗進圍潼州十二月戊辰命太子舍
人元貞還北為東魏主

二年春正月癸巳朔兩月相承如鉤見于西方戊戌詔在

南史卷之八
三
位各舉所知己亥東魏克潁陽辛丑以尚書僕射謝舉為
尚書令以守吏部尚書王克為尚書僕射甲辰東魏尅殷
豫二州三月甲辰撫軍將軍高麗王高延卒以其子成為
寧東將軍高麗王樂浪公己未屈獠洞斬李賁傳首建鄴
夏四月丙子詔在朝及州郡各舉士五月辛丑以新除中
書令邵陵王綸為安前將軍開府儀同三司辛亥曲赦交
愛德三州六月天裂于西北長十丈闊二丈光出如電其
聲若雷秋七月使兼散騎常侍謝班聘于東魏結和八月
戊戌侯景舉兵反甲辰使開府儀同三司邵陵王綸都督
衆軍討景曲赦南豫州九月戊辰地震江左尤甚壞屋殺

人地生白毛長二尺益州市有飛螽萬群螫人死冬十月
侯景襲譙州進攻陷廩陽戊申以臨賀王正德為平北將
軍都督諸軍屯丹楊郡己酉景自橫江濟採石辛亥至建
鄴臨賀王正德率眾附賊十一月戊午朔設壇刑白馬祀
蚩尤於太極殿前己未景立蕭正德為天子於南關前辛
酉賊攻陷東府城庚辰邵陵王綸帥武州刺史蕭弄璋前
譙州刺史趙伯超等入援乙酉進軍湖頭與賊戰賊敗績
丙戌安北將軍鄱陽王範遣世子嗣雄信將軍裴之高等
率眾入援次張公洲十二月戊申天西北裂有光如火尚
書令謝舉卒丙辰司州刺史柳仲禮前衡州刺史韋粲高

州刺史李遷仕前司州刺史羊鴉仁等率軍入援

三年春正月丁巳大都督柳仲禮率衆軍分據南岸賊濟
軍於青塘襲殺韋粲庚申白虹貫日三重邵陵王綸臨城
公大連等率兵集南岸戊辰有流星長三十丈墮武庫李
遷仕及天門太守樊文皎進軍青溪東為賊所破文皎死
之壬午熒惑守心二月侯景遣使求和皇太子固請帝乃
許之盟于西華門下景既運東城米歸于石頭亦不解圍
啓求遣諸軍退丁未皇太子又命南兖州刺史南康王會
理前青冀二州刺史湘潭侯退率江北之衆頓于蘭亭苑
甲子以開府儀同三司丹陽尹邵陵王綸為司空以合州

刺史鄱陽王範為征北大將軍開府儀同三司以司州刺史柳仲禮為侍中尚書僕射時景姦計既成乃表陳帝失復舉兵向關三月城內以景違盟設壇告天地神祇戊午前司州刺史羊鴉仁等進軍東府北與賊戰大敗時四方征鎮入援者三十餘萬莫有鬪志自相抄奪而已丁卯賊攻陷宮城縱兵大掠己巳賊矯詔遣石城公大款解外援軍庚午侯景自為都督中外諸軍事大丞相錄尚書事辛未援軍各退散丙子熒惑守心夏四月己丑都下地震丙申又震己酉帝以所求不供憂憤寢疾是月青冀二州刺史明少遐東徐州刺史湛海珍北青州刺史王奉伯各舉

州附東魏五月丙辰帝崩于淨居殿時年八十六辛亥遷梓宮于太極前殿十一月乙卯葬于脩陵追尊為武皇帝廟號高祖帝性淳孝六歲獻皇太后崩水漿不入口三日哭泣有過成人及丁文帝憂時為齊隨王諮議隨府在荆鎮以病間便投劾星馳不復寢食倍道就路憤風驚浪不暫停止帝形容本壯及至都銷毀骨立親表士友皆不復識望宅奉諱氣絕久之每哭輒歐血數升服內日惟食麥二溢拜埽山陵涕淚所洒松草變色及居帝位即於鎮山造大愛敬寺青溪邊造智度寺於臺內立至敬等殿又立七廟堂月中再設淨饌每至展拜涕泗滂沲哀動左右少

而篤學能事畢究雖萬機多務猶卷不輟手然燭側光常
至戊夜撰通史六百卷金海三十卷制旨孝經義周易講
疏及六十四卦二繫文言序卦等義樂社義毛詩春秋答
問尚書大義中庸講疏孔子正言孝經講疏凡二百餘卷
王侯朝臣皆奉表質疑帝皆為解釋脩飾國學增廣生員
立五館置五經博士天監初何佟之賀瑒嚴植之明山賓
等覆述制旨并撰吉凶賓軍嘉五禮一千餘卷帝稱制斷
疑焉大同中於臺西立士林館領軍朱异太府卿賀琛舍
人孔子袞等遞互講述皇太子宣城王亦於東宮宣猷堂
及揚州解開講於是四方郡國莫不向風爰自在田及登

寶位躬制贊序詔誥銘說箴頌牋奏諸文又百二十卷六
藝備閑基登逸品陰陽緯候卜筮占決草隸尺牘騎射莫
不稱妙晚乃溺信佛道日止一食膳無鮮腴惟豆羹糲飯
而已或遇事擁日儻移中便嗽口以過製涅槃小品淨名
三慧諸經義記數百卷聽覽餘閑即於重雲殿及同泰寺
講說名僧碩學四部聽衆常萬餘人身衣布衣木綿皂帳
一冠三載一被二年自五十外便斷房室後宮職司貴妃
以下六宮嫔褔三翟之外皆衣不曳地傍無錦綺不飲酒
不聽音聲非宗廟祭祀大會饗宴及諸法事未嘗作樂勤
於政務孜孜無怠每冬月四更竟即敕把燭看事執筆觸

寒手為皴裂然仁愛不斷親親及所愛愆犯多有縱捨故
政刑弛紊每決死罪常有哀矜涕泣然後可奏性方正雖
居小殿暗室恒理衣冠小坐暑月未嘗褰袒雖見內豎小
臣亦如遇大賓也初齊高帝夢寢而登殿顧見武明二帝
後一人手張天地圖而不識問之荅曰順子後及崔慧景
之逼長沙宣武王入援至越城夢乘馬飛半天而隊帝所
馭化為赤龍騰虛獨上時臺內有宿衛士為覲常見太極
殿有六龍各守一柱末忽失其二後見在宣武王宅時宣
武為益州覲乃往蜀伏事及宣武在郢此覲還都乃見六
龍俱在帝所寢齋遂去郢之雍中途遇疾且死謂同侶曰

蕭雍州必作天子具以前事語之推此而言蓋天命也雖在蒙塵齋戒不廢及疾不能進膳盟歎如初皇太子日中再朝每問安否涕泗交面賊臣侍者莫不掩泣疾久口苦索蜜不得再曰荷荷遂崩賊祕之太子問起居不得見慟于閣下始天監中沙門釋寶誌為詩曰昔年三十八今年八十三四中復有四城北火酣酣帝使周捨封記之及中大同元年同泰寺災帝啓封見捨手迹為之流涕帝生於甲辰三十八尅建鄴之年也遇災歲實丙寅八十三矣四月十四日而火起之始自浮屠第三層三者帝之昆季次也帝惡之召太史令虞翻筮之遇凶復曰無害其繇云西

南得朋東北喪朋安貞吉文言云東北喪朋乃終有慶帝
曰斯魔鬼也酉應見卯金來剋木卯為陰賊鬼而帶賊非
魔何也孰為致之酉為口舌當乎說位說言乎允故知善
言之口宜前為法事於是人人讚善莫不從風或刺血灑
地或刺血書經穿心然燈坐禪不食及太清元年帝捨身
光嚴重雲殿游仙化生皆震動三日乃止當時謂之祥瑞
識者以非動而動在鴻範為祲以比石季龍之敗殿壁畫
人頸皆縮入頭之類時海中浮鵠山去餘姚岸可千餘里
上有女人年三百歲有女官道士四五百人年並出百但
在山學道遣使獻紅席帝方捨身時其使適至云此草常

有紅鳥居下故以為名觀其圖狀則鸞鳥也時有男子不知何許人於大衆中自割身以飴飢鳥血流徧體而顏色不變又沙門智泉鐵鈎挂體以然千燈一日一夜端坐不動開講日有三足鳥集殿之東戶自戶適于西南縣楣三飛三集白雀一見于重雲閣前連理樹又有五色雲浮於華林園昆明池上帝既流遁益甚境内化之遂至喪亡云論曰梁武帝時逢昏虐家遭冤禍既地居勢勝東機而作以斯文德有此武功始用湯武之師終濟唐虞之業豈曰人謀亦惟天命及據圖籙多歷歲年制造禮樂敦崇儒雅自江左以來年踰二百文物之盛獨美于茲然先王文武

遘用德刑備舉方之水火取法陰陽為國之道不可獨任
而帝留心俎豆忘情于戚溺於釋教弛於刑典既而帝紀
不立悖逆萌生反噬彎弧皆自子弟履霜弗戒卒至亂亡
自古撥亂之君固已多矣其或樹置失所而以後嗣失之
未有自己而得自己而喪追蹤徐偃之仁以致窮門之酷
可為深痛可為至戒者乎

梁本紀中第七

南史七

梁本紀下第八

南史八

李

延壽

太宗簡文皇帝諱綱字世讚小字六通武帝第三子昭明
太子母弟也天監二年十月丁未生于顯陽殿五年封晉安
王普通四年累遷都督雍州刺史中大通三年被徵入朝
未至而昭明太子謂左右曰我夢與晉安王對奕擾道我
以班劍授之王還當有此加乎四月昭明太子薨五月丙申
立晉安王為皇太子七月乙亥臨軒策拜以脩繕東宮權居
東府四年九月移還東宮太清三年臺城陷太子坐求福
省見侯景神色自若無懼容五月丙辰帝崩辛巳太子即皇

南齊書卷之八
帝位大赦癸未追尊穆貴嬪為皇太后追謚妃王氏為簡
皇后六月丙戌以南康王會理為司空丁亥立宣城王大
器為皇太子壬辰立當陽公大心為尋陽郡王石城公大
欸為江夏郡王寧國公大臨為南海郡王臨城公大連為
南郡王西豐公大春為安陸郡王新塗公大成為山陽郡
王臨湘公大封為宜都郡王高唐公大莊為新興郡王秋
七月甲寅廣州刺史元景仲謀應侯景西江督護陳霸先
攻之景仲自殺霸先迎定州刺史蕭勃為刺史庚午以司
空南康王會理為兼尚書令是月九江大饑人相食者十
四五八月癸卯征東大將軍開府儀同三司南徐州刺史

蕭藻薨丙午侯景矯詔儀同三司位比正公自今悉不加
將軍以為定準冬十月丁未地震是月百濟國遣使朝貢
見城寺荒蕪哭于闕下

大寶元年春正月辛亥朔大赦改元丁巳天雨黃沙己未
西魏剋安陸執司州刺史柳仲禮盡有漢東地丙寅月晝
見于東方癸酉前江都令祖皓起義兵于廣陵二月癸未
侯景攻下廣陵皓見害乙巳以尚書僕射王克為左僕射
丙午侯景逼帝幸西州夏五月丙辰東魏靜帝遜位于齊
庚午開府儀同三司鄱陽王範薨自春迄夏大旱人相食
都下尤甚六月庚子前司州刺史羊鴉仁自尚書省出奔

江陵秋七月戊辰賊行臺任約寇江州刺史尋陽王大心以州降之八月甲午湘東王繹遣領軍將軍王僧辯逼郢州邵陵王綸棄郢州走九月乙亥侯景自進位相國封二十郡為漢王冬十月乙未景又逼帝幸西州曲宴自加宇宙大將軍都督六合諸軍事立皇子大鈞為西陽郡王大威為武寧郡王大球為建安郡王大昕為義安郡王大摯為綏建郡王大圜為樂梁郡王壬寅侯景害司空南康王會理十一月任約進據西陽分兵寇齊昌執衡陽王獻送都下害之湘東王繹遣前寧州刺史徐文盛拒約南郡王前中兵參軍張彪起義於會稽若邪山攻破浙東諸縣

二年春二月邵陵王綸走至安陸董城爲魏所攻見殺三月庚戌魏文帝崩夏閏四月侯景圍巴陵六月乙巳解圍宵遁秋七月景還至建鄴八月戊午景遣僞衛尉卿彭雋廂公王僧貴入殿廢帝爲晉安王害皇太子大噐尋陽王大心西陽王大鈞武寧王大威建安王大球義安王大昕及尋陽王諸子二十餘人矯爲帝詔以爲次當支庶宜歸正嫡禪位于豫章王棟使呂季略送詔令帝寫之帝書至先皇念神器之重思社稷之固越外非次遂主震方嗚咽不能自止賊衆皆爲掩泣乃幽帝于永福省棟即位改元天正使害南海王大臨於吳郡南郡王大連於姑熟安陸

王大春於會稽新興王大莊於京口冬十月壬寅帝崩於永福省時年四十九賊僞謚曰明皇帝廟稱高宗明年三月己丑王僧辯平侯景率百官奉梓宮升朝堂元帝追崇爲簡文皇帝廟號太宗四月乙丑葬莊陵帝幼而聰睿六歲便能屬文武帝弗之信於前面試帝攬筆立成文武帝歎曰常以東阿爲虛今則信矣及長器宇寬弘未嘗見喜愠色尊嚴若神方頤豐下須鬚如畫直髮委地雙眉翠色項毛左旋連錢入背手執玉如意不相分辨眄睐則目光燭人讀書十行俱下辭藻艷發博綜羣言善談玄理自十一便能親庶務歷試藩政所在稱美性恭孝居穆貴嬪憂

哀毀骨立所坐席露濕盡爛在襄陽拜表侵魏遣長史柳
津司馬董當門壯武將軍杜懷寶振遠將軍曹義宗等進
軍剋南陽新野等郡拓地千餘里及居監撫多所弘宥文
案簿領纖豪必察弘納文學之士賞接無倦嘗於玄圃述
武帝所製五經講疏聽者傾朝野雅好賦詩其自序云七
歲有詩癖長而不倦然帝文傷於輕靡時號宮體所著昭
明太子傳五卷諸王傳三十卷禮大義二十卷長春義記
一百卷法寶連璧三百卷謝客文涇渭三卷玉簡五十卷
光明符十二卷易林十七卷竈經二卷沐浴經三卷馬藥
譜一卷碁品五卷彈碁譜一卷新僧白澤圖五卷如意方

十卷文集一百卷並行於世初即位制年號將曰文明以
外制強臣取周易內文明而外柔順之義恐賊覺乃改為
大寶雖在蒙塵尚引諸儒論道說義披尋墳史未嘗暫釋
及見南康王會理誅知不久指所居殿謂舍人殷不害曰
龐涓死此下又曰吾昨夢吞土試思之不害曰昔重耳饋
塊卒反晉國陛下所夢將符是乎帝曰儻幽冥有徵異斯
言不妄初景納帝女溧陽公主公主有美色景惑之妨於
政事王偉每以為言景以告主主出惡言偉知之懼見詭
乃謀廢帝而後間主苦勸行殺以絕衆心廢後王偉乃與
彭儁王脩纂進觴於帝曰丞相以陛下幽憂既久使臣上

壽帝笑曰已禪帝位何得言陛下此壽酒將不盡此乎於是雋等并齎酒餚曲項琵琶與帝極飲帝知將見殺乃盡酣謂曰不圖為樂一至於斯既醉而寢偉乃出雋進土囊王脩纂坐上乃崩竟協於夢偉撤戶扉為棺遷殯于城北酒庫中帝自幽繫之後賊乃撤內外侍衛使突騎圍守牆垣悉有枳棘無復紙乃書壁及板鄣為文自序云有梁正士蘭陵蕭世讚立身行道終始若一風雨如晦雞鳴不已弗欺暗室豈況三光數至於此命也如何又為文數百篇崩後王偉觀之惡其辭切即使刮去有隨偉入者誦其連珠三首詩四篇絕句五篇文並悽愴云

世祖孝元皇帝諱繹字世誠小字七符武帝第七子也初武帝夢眇目僧執香鑪稱託生王宮旣而帝母在采女次侍始褰戶幔有風回裾武帝意感幸之采女夢月墮懷中遂孕天監七年八月丁巳生帝舉室中非常香有紫胞之異武帝竒之因賜采女姓阮進為脩容十三年封湘東王太清元年累遷為鎮西將軍都督荊州刺史三年三月侯景陷建鄴四月世子方等至自建鄴知臺城不守帝命柵江陵城周回七十里鎮西長史王冲等拜牋請為太尉都督中外諸軍事承制主盟帝不許曰吾於天下不賤寧俟都督之名帝子之尊何藉上台之位議者可斬投筆流淚

冲等重請不從又請爲司空以主諸侯亦弗聽乃開鎮西府辟天下士是月帝徵兵於湘州刺史河東王譽譽拒命尋上甲侯韶自建鄴至宣三月十五日密詔授帝位假黃鉞大都督中外諸軍事司徒承制於是立行臺於南郡而置官司焉七月遣世子方等討河東王譽軍敗死之又遣鎮兵將軍鮑泉討譽九月乙卯雍州刺史岳陽王譽舉兵寇江陵其將杜弼兄弟來降譽遁走鮑泉攻湘州未克又遣左衛將軍王僧辯代將及簡文帝即位改元爲大寶元年帝以簡文帝子賊臣卒不遵用正月使少子方譽質于魏魏不受質而結爲兄弟四月克湘州斬譽湘州平雍州

刺史岳陽王譽自稱梁王蕃于魏魏遣兵助伐襄陽先是
邵陵王綸書已言凶事祕之以待湘州之捷是月壬寅始
命陳瑩報武帝崩問帝哭于正寢六月江夏王大款山陽
王大成宜都王大封自信安來奔九月辛酉以前郢州刺
史南平王恪為中衛將軍尚書令開府儀同三司改封大
款為臨川郡王大成為桂陽郡王大封為汝南郡王十一
月甲子南平王恪等奉牋進位相國摠百揆帝不從二年
三月侯景悉兵西上閏四月景遣其將朱子仙任約襲郢
州執刺史方諸庚戌領軍王僧辯屯師巴陵五月癸未帝
遣將胡僧祐陸法和援巴陵六月僧祐等擊破景將任約

軍禽約景解圍宵遁以王僧辯為征東將軍開府儀同三司尚書令帥衆追景所至皆捷進圍郢州獲賊將宋子仙等九月盤盤國獻馴象十月辛丑朔紫雲如蓋臨江陵城是月簡文帝崩開府儀同三司王僧辯等奉表勸進帝奉諱大臨三日百官縞素各表不許司空南平王恪率宗室領軍將軍胡僧祐率群僚江州別駕張佚率吏人並奉牋勸進帝固讓十一月乙亥僧辯又奉表勸進又不從時巨寇尚存帝未欲即位而四方表勸前後相屬乃下令斷表承聖元年二月王僧辯衆軍發自尋陽帝馳檄四方購獲景及逆者封萬戶開國公綰布五萬疋三月僧辯等平景

傳首江陵戊子以賊平告明堂太社己丑僧辯等又表勸
進曰衆軍以今月戊子摠集建康賊景鳥伏獸窮頻擊頻
挫茲竭詐盡深溝自固臣等分勒武旅百道同趨突騎短
兵羣函鐵楯結隊千羣持戟百萬止紂七步圍項三重轟
然大潰羣凶四滅京師少長俱稱萬歲長安酒食於此價
高九縣雲開六合清朗矧伊黔首誰不載躍伏惟陛下咀
痛茹哀嬰憤忍酷自紫庭絳闕胡塵四起壖垣好時箕馬
雲屯泣血臨兵嘗膽誓衆而吳楚一家方與七國俱反管
蔡流言又以三監作亂西涼義衆阻秦塞而不通并州遺
黎跨飛狐而見絕豺狼當路非止一人鯨鯢不梟脩焉五

載英武克振怨耻並雪永尋霜露伊何可勝臣等輒依故
實奉脩社廟使者持節分告園陵嗣后升遐龍道未殯承
華掩曜梓宮莫測並即隨由備辦禮具以荒四海同哀六
軍袒哭聖情孝友理當感慟日者百司岳牧仰祈宸鑒以
錫珪之功既歸有道當璧之禮允屬聖明而優詔謙冲杳
然凝貌飛龍可躋而乾爻在四帝閭云叫而閭闔未開謳
歌再馳是用翹首所以越人固執熏丹穴以求君周人樂
推踰岐山而事主漢王不即位無以貴功臣光武止蕭王
豈謂紹宗廟黃帝迷於襄城尚訪御人之道放勛寂於姑
射猶使罇俎有歸伊此儻來豈聖人所欲帝王所應不獲

已而然伏讀圖書尋諷制旨領懷物外未奉慈衷陛下日
角龍顏之姿表於徇齊之日彤雲素靈之瑞基於應物之
初博學則大哉無所與名深言則晬乎文章之觀忠為令
德孝實動天加以英威茂略雄圖武筭指麾則丹浦不戰
顧眄則阪泉自蕩地維絕而重紐天柱傾而更植鑿河津
於孟門百川復啓補穹儀以五石萬物再生縱陛下拂衣
而游廣城登嶠山而去東土羣臣安得仰訴兆庶何所歸
仁況郊祀配天壘匪禮曠齋宮清廟匏竹不陳仰望鸞輿
匪朝伊夕瞻言法駕載渴且飢豈可久稽衆議有曠彝則
舊邦凱復函洛已平高奴櫟陽宮館雖毀濁河清渭佳氣

猶存臯門有亢甘泉四敞土圭測景仙人承露斯蓋九州
之赤縣六合之樞機博士捧圖書而稍還太常定禮儀其
已立豈得不揚清醴而赴名都具玉鑾而旋正寢昔東周
既遷鎬京遂其不復長安一亂郊洛永以為居夏后以萬
國朝諸侯文王以六州匡天下方之跡基百里劒杖三尺
以殘楚之地抗拒六戎一旅之卒翦夷三叛坦然大定御
辯東歸解五牛於冀州秣六馬於譙郡緬求前古其可得
歟對揚天命無所讓德有理存焉敢重祈奏帝尚未從辛
卯宣猛將軍朱買臣奉帝密旨害豫章王棟及其二弟橋
樛四月乙巳益州刺史新除假黃鉞太尉武陵王紀僭位

於蜀年號天正帝遣兼司空蕭泰祠部尚書樂子雲拜謁
瑩陵脩復社廟丁巳下令解嚴五月庚午司空南平王恪
及宗室王侯大都督王僧辯等復拜表上尊號帝猶固讓
甲申以開府儀同三司江州刺史王僧辯為司徒乙酉斬
賊左僕射王偉尚書呂季略少府卿周石珍舍人嚴買於
江陵市乃下令赦境內齊將潘樂辛術等攻秦郡王僧辯
遣將杜薊帥眾拒之以陳霸先為征北大將軍開府儀同
三司徐州刺史齊人賀平侯景八月武陵王紀率巴蜀之
眾東下遣護軍將軍陸法和屯巴峽以拒之九月甲戌司
空南平王恪薨十月乙未前梁州刺史蕭循自魏至江陵

以為平北將軍開府儀同三司戊申執湘州刺史王琳於
殿內庚戌琳長史陸納及其將潘烏累等舉兵反攻陷湘
州是月四方征鎮王公卿士復勸進表三上乃許之冬十
一月丙子皇帝即位於江陵改太清六年為承聖元年逋
租宿責並許弘宥孝子順孫悉皆賜爵長徒鎖士特加原
宥禁錮奪勞一皆曠蕩是日帝不升正殿公卿陪列而已
時有兩日俱見己卯立王太子方矩為皇太子改名元良
立皇子方智為益安郡王方略為始安郡王追尊所生妣
阮脩容為文宣太后改謚忠壯太子為武烈太子封武烈
子莊為永嘉王是月陸納遣將軍潘烏累等破衡州刺史

丁道貴於涿口道貴走零陵十二月陸納分兵襲巴陵湘
州刺史蕭循擊走之天門山獲野人出山三日而死星隕
吳郡淮南有野象數百壞人室廬宣城郡猛獸暴食人是
歲魏廢帝元年

二年春正月乙丑詔王僧辯討陸納戊寅以吏部尚書王
褒為尚書僕射己卯江夏宮南門簷牡飛三月庚寅有兩
龍見湘州西江夏五月甲申魏大將尉遲迴進兵逼巴西
潼州刺史楊乾運以城納迴己丑武陵王紀軍至西陵六
月乙卯王僧辯平湘州秋七月武陵王紀衆大潰見殺八
月戊戌尉遲迴平蜀九月齊遣郭元建及將邢景遠步大

汗薩東方老帥衆頓合肥冬十一月辛酉僧辯留鎮姑熟
豫州刺史侯瑱據東關壘徵吳興太守裴之橫帥衆繼之
戊戌以尚書僕射王褒為左僕射湘東太守張綰為右僕
射十二月宿豫土人東方光據城歸北齊江西州郡皆起
兵應之

三年春正月魏帝為相安定公所廢而立齊王廓是為恭
帝元年三月主衣庫見黑蛇長丈許數十小蛇隨之舉頭
高丈餘南望俄失所在帝又與宮人幸玄洲苑復見大蛇
盤屈於前羣小蛇遶之並黑色帝惡之宮人曰此非怪也
恐是錢龍帝敕所司即日取數千萬錢鎮於蛇處以厭之

因設法會赦囚徒振窮乏退居栖心省又有蛇從屋墮落
帝帽上忽然便失又龍光殿上所御肩輿復見小蛇縈屈
輿中以頭駕夾膝前金龍頭上見人走去逐之不及城濠
中龍騰出煥爛五色竦躍入雲六七小龍相隨飛去羣魚
騰躍墜死於陸道龍處為窟若數百斛圍舊大城上常有
紫氣至時稍復消歇甲辰以司徒王僧辯為太尉車騎大
將軍戊申以護軍將軍郢州刺史陸法和為司徒夏四月
癸酉以征北大將軍開府儀同三司陳霸先為司空六月
癸未有大黑氣如龍見于殿內秋九月辛卯帝於龍光殿述
老子義先是魏使宇文弼來聘齊使又至江陵帝接仁

恕有關魏相安定公憾焉乙巳使柱國萬紐于謹來攻冬
十月丙寅魏軍至襄陽梁王蕭詧率衆會之丁卯停講內
外戒嚴興駕出行城柵大風拔木丙子續講百寮戎服以
聽詔徵王僧辯十一月甲申幸津陽門講武置南北兩城
主帝親觀閱風雨摠集部分未交旗幟飄亂帝趣駕而回
無復次序風雨隨息衆竊驚焉乙酉以領軍胡僧祐為都
督城東城北諸軍事右僕射張綰為副左僕射王褒都督
城西城南諸軍事直殿省元景亮為副丁亥魏軍至柵下
丙申徵廣州刺史王琳入援丁酉大風城內火燒居人數
千家以為失在婦人斬首尸之是日帝猶賦詩無廢以胡

僧祐爲開府儀同三司庚子信州刺史徐世譜晉安王司馬任約軍次馬頭岸是夜有流星墜城中帝援蓍筮之卦成取龜式驗之因抵于地曰吾若死此下豈非命乎因裂帛爲書催僧辯曰吾忍死待公可以至矣戊申胡僧祐朱買臣等出戰買臣敗績辛亥魏軍大攻帝出枇杷門親臨陣督戰僧祐中流矢薨軍敗反者斬西門守卒以納魏軍帝見執如梁王蕭譽營甚見詰辱他日乃見魏僕射長孫儉謫儉云埋金千斤於城內欲以相贈儉乃將帝入城帝因述營相辱狀謂儉曰向聊相謫欲言耳豈有天子自埋金乎儉乃留帝於主衣庫十二月丙辰徐世譜任約退戊

巴陵辛未魏人戕帝明年四月梁王方智承制追尊為元
皇帝廟號世祖帝聰悟俊朗天才英發出言為論音響若
鍾年五六歲武帝嘗問所讀書對曰能誦曲禮武帝使誦
之即誦上篇左右莫不驚歎初生患眼醫療必增武帝自
下意療之遂盲一目乃憶先夢彌加愍愛及長好學博極
羣書武帝嘗問曰孫策在江東于時年幾荅曰十七武帝
曰正是汝年帝性不好聲色頗慕高名為荊州刺史起州
學宣尼廟嘗置儒林參軍一人勸學從事二人生三十人
加粟餼帝工書善畫自圖宣尼像為之贊而書之時人謂
之三絕與裴子野劉顯蕭子雲張纘及當時才秀為布衣

交常自比諸葛亮桓溫惟續許焉性好矯飾多狙忌於名
無所假人微有勝已者必加毀害帝姑義興昭長公主子
王銓兄弟八九人有盛名帝妬害其美遂改寵姬王氏兄
王珩名琳以同其父名忌劉之遴學使人鳩之如此者甚
衆雖骨肉亦徧被其禍始居文宣太后憂依丁蘭作木母
及武帝崩祕喪逾年乃發凶問方刻檀為像置于百福殿
內事之甚謹朝夕進蔬食動靜必啓聞迹其虛矯如此性
愛書籍既患目多不自執卷置讀書左右番次上直晝夜
為常略無休已雖睡卷猶不釋五人各伺一更恒致達曉
常眠熟大軒左右有睡讀失次第或偷卷度紙帝必驚覺

更令追讀加以橫楚雖戎略殷湊機務繁多軍書羽檄文章詔誥點毫便就殆不游手常曰我韜於文士愧於武夫論者以為得言始在尋陽夢人曰天下將亂王必維之又背生黑子巫媪見曰此大貴不可言初武帝敕賀革為帝府諮議使講三禮革西上意甚不悅過別御史中丞江革江革告之曰吾嘗夢主上徧見諸子至湘東王脫帽授之此人後必當璧卿其行乎革領之及太清之禍遂膺歸運自侯景之難州郡大半入魏自巴陵以下至建康緣以長江為限荊州界北盡武寧西拒峽口自嶺以南復為蕭勃所據文軌所同千里而近人戶著籍不盈三萬中興之盛

盡於是矣武陵之平議者欲因其舟艦遷都建鄴宗懷黃
羅漢皆楚人不願移帝及胡僧祐亦俱未欲動僕射王褒
左戶尚書周弘正驟言即楚非便宗懷及御史大夫劉懿
以為建鄴王氣已盡且渚宮洲已滿百於是乃留尋而歲
星在井熒惑守心帝觀之慨然而謂朝臣文武曰吾觀玄
象將恐有賊但吉凶在我運數由天避之何益及魏軍逼
閭人朱買臣按劍進曰惟有斬宗懷黃羅漢可以謝天下
帝曰襄實善意宗黃何罪二人退入於人中及魏人燒柵
買臣謝荅仁勸帝乘暗潰圍出就任約帝素不便馳馬曰
事必無成徒增辱耳荅仁又求自扶帝以問僕射王褒褒

曰荅仁侯景之黨豈是可信成彼之勲不如降也乃聚圖書十餘萬卷盡燒之荅仁又請守子城收兵可得五千人帝然之即授城內大都督以帝鼓吹給之配以公主旣而又召王褒謀之荅仁請入不得歐血而去遂使皇太子王褒出質請降有頃黃門郎裴政犯門而出帝乘白馬素衣出東門抽劔擊闔曰蕭世誠一至此乎魏師至凡二十八日徵兵四方未至而城見剋在幽逼求酒飲之製詩四絕其一曰南風且絕唱西陵最可悲今日還蒿里終非封禪時其二曰人世逢百六天道異貞恒何言異螻蟻一旦損鵬鵬其三曰松風侵曉哀霜寒當夜來寂寥千載後誰畏

軒轅臺其四曰夜長無歲月安知秋與春原陵五樹杏空
得動耕人梁王嘗遣尚書傳準監行刑帝謂之曰卿幸爲
我宣行準捧詩流淚不能禁進土囊而殯之梁王嘗使以
布帊纏屍斂以蒲席束以白茅以車一乘葬于津陽門外
愍懷太子元良及始安王方略等皆見害徐世譜任約自
馬頭走巴陵約後降于齊將軍裴綫綫弟機並被害謝朓
仁三人相抱俱見屠汝南王大封尚書左僕射王褒以下
並為俘以歸長安乃選百姓男女數萬口分為奴婢小弱
者皆殺之帝於伎術無所不該嘗不得南信筮之遇剥之
艮曰南信已至今當遣左右季心往看果如所說賓客咸

驚其妙凡所占決皆然初從劉景愛相術因訊以年荅曰
未至五十當有小厄禳之可免帝自勉曰苟有期會禳之
何益及是四十七矣特多禁忌牆壁崩倒屋宇傾頽年月
不便終不脩改庭草蕪沒令鞭去之其慎護如此著孝德
傳忠臣傳各三十卷丹楊尹傳十卷注漢書一百十五卷
周易言疏十卷內典博要百卷連山三十卷詞林三卷玉
韜金樓子補闕子各十卷老子講疏四卷懷舊傳二卷古
今全德志荆南地記貢職圖古今同姓名錄一卷策經十
二卷式贊三卷文集五十卷初承聖二年三月有二龍自
南郡城西升天百姓聚觀五采分明江陵故老竊相泣曰

昔年龍出建康淮而天下大亂今復有焉禍至無日矣帝
聞而惡之踰年而遘禍又江陵先有九十九洲古老相承
云洲滿百當出天子桓玄之為荊州刺史內懷篡逆之心
乃遣鑿破一洲以應百數隨而崩散竟無所成宋文帝為
宜都王在藩一洲自立俄而文帝纂統後遇元凶之禍此
洲還沒太清末枝江楊之閣浦復生一洲羣公上疏稱慶
明年而帝即位承聖末其洲與大岸相通惟九十九云

敬皇帝諱方智字慧相小字法真元帝第九子也太清三
年封興梁侯承聖元年封晉安郡王二年出為江州刺史
三年十一月魏剋江陵太尉王僧辯司空陳霸先定議以

帝為梁王太宰承制四年二月癸丑於江州奉迎至建鄴
入居朝堂以太尉王僧辯為中書監錄尚書驃騎大將軍
都督中外諸軍事加司空陳霸先班劍二十人以湘州刺
史蕭循為太尉廣州刺史蕭勃為司徒三月齊遣其上黨
王高渙送貞陽侯蕭明來主梁嗣至東關遣吳興太守裴
之橫拒之與戰敗績死之四月司徒陸法和以郢州附齊
遣江州刺史侯瑱討之七月辛丑僧辯納貞陽侯蕭明自
採石濟江甲辰入建鄴丙午即偽位年號天成以帝為皇
太子司空陳霸先襲殺王僧辯黜蕭明而奉帝焉

紹泰元年秋九月丙午皇帝即位冬十月己巳大赦改元

以貞陽侯蕭明為司徒封建安郡公壬子加司空陳霸先
尚書令都督中外諸軍事瓠州刺史杜龕舉兵攻信武將
軍陳蒨於長城義興太守韋載應之癸丑以太尉蕭循為
太保以司徒蕭明為太傅司徒蕭勃為太尉以鎮南將軍
王琳為車騎將軍開府儀同三司戊午尊所生夏貴妃為
皇太后立妃王氏為皇后辛未司空陳霸先東討韋載降
之丙子南豫州刺史任約譙秦二州刺史徐嗣徽舉兵據
石頭反十一月庚辰齊安州刺史程子崇楚州刺史柳達
摩率眾赴任約入石頭十二月庚戌任約徐嗣徽等至採
石迎齊援丙辰遣猛烈將軍侯安都於江寧邀擊敗之約

嗣徽等奔江西庚申翟子崇等降並放還北

太平元年春正月戊寅大赦追贈謚簡文帝諸子封故永安侯確子後為邵陵王奉攜王後癸未震州刺史杜龕降詔賜死赦吳興郡己亥以太保宜豐侯蕭循襲封鄱陽王東揚州刺史張彪圍臨海太守王懷振於剡巖二月庚戌遣周文育陳蒨襲會稽討彪敗走以中衛將軍臨川王大款即本號開府儀同三司丙辰若邪村人斬張彪傳首建鄴赦東揚州甲子以東土經杜龕張彪之亂遣大使巡省是月齊人來聘使侍中王廓報聘三月壬午班下遠近並雜用今古錢戊戌齊將蕭軌出柵口向梁山陳霸先大敗

之夏四月壬申侯安都輕兵襲齊行臺司馬恭於歷陽大破之五月癸未太傅建安公蕭明薨庚寅齊軍水步入丹楊縣內外纂嚴六月壬子齊軍至玄武湖西北乙卯陳霸先大破齊軍戊午大赦辛酉解嚴秋七月丙子司空陳霸先進位司徒丁亥以開府儀同三司侯瑱為司空八月己酉太保鄱陽王循薨九月壬寅大赦改元司徒陳霸先進位丞相錄尚書事改封義興郡公加中權將軍王冲開府儀同三司以吏部尚書王通為尚書右僕射冬十月乙亥魏相安定公薨十一月起雲龍神武門十二月壬申進太尉蕭勃為太保甲午封前壽昌令劉叡為汝陰王前鎮西

法曹行參軍蕭沆為巴陵王奉宋齊二代後庚子魏恭帝遜位于周

二年春正月壬寅詔求魯國孔氏族為奉聖侯并繕廟堂供備祀典又詔諸州各置中正舊放舉選不得輒承單狀序官皆須中正押上然後量授其選中正每求耆德該悉以他官領之以開府儀同三司王琳為司空以尚書右僕射王通為左僕射二月庚午遣領軍將軍徐度入東關太保廣州刺史蕭勃舉兵反詔平西將軍周文育平南將軍侯安都等南討戊子徐度至合肥燒齊船舶三千艘癸巳周文育軍於巴山獲蕭勃偽帥歐陽頔三月甲寅德州刺

史陳法武前衡州刺史譚遠於始興攻殺蕭勃夏四月癸酉曲赦江廣衡三州并督內為賊所拘逼者已卯鑄四柱錢一當二十齊遣使通和壬辰改四柱錢一當十丙申復用細錢五月乙巳平西將軍周文育進號鎮南將軍平南將軍侯安都進號鎮北將軍並開府儀同三司戊辰余孝頃遣使詣丞相府求降秋八月加丞相陳霸先殊禮九月周冢宰宇文護殺閔帝丞相陳霸先改授相國封陳國公冬十月戊辰進陳國公爵為王辛未帝遜位于陳陳受命奉帝為江陰王薨于外邸時年十六追謚敬皇帝

論曰帝王之位天下之重職文武之道守聘所常遵其於

行用義均水火相資則可專任成亂觀夫有梁諸帝皆一
之而已簡文文明之姿稟乎天授粵自支庶入居明兩經
國之筭其道弗聞宮體所傳且變朝野雖主虛號何救滅
亡元帝居勢勝之地啓中興之業旣雪讎恥且應天人而
內積猜忍外崇矯飾攀號之節忍酷於踰年定省之制申
情於木偶竟而雍州引寇釁起河東之戮益部親尋事習
邵陵之窘悖辭屈於僧辯殘虐極於圓正不義不昵若斯
之甚而復謀無經遠心勞志大近捨宗國遠迫強隣外弛
藩籬內崇講肆卒於溘至戕隕方追始皇之迹雖復文籍
滿腹何救社廟之墟歷觀書契以來蓋亦廢興代有未見

三葉遘愍頓若蕭宗之酷敬皇以此冲年當斯頽運將不高揖其可得乎初武帝末年都下用錢每百皆除其九謂爲九佰竟而有侯景之亂及江陵將覆每百復除六文稱爲六佰識者以爲九者陽九六者百六蓋符歷數非人事也善乎鄭文貞公論之曰高祖固天收縱聰明稽古道亞生知學爲博物允文允武多藝多才爰自諸生有不羈之度屬昏凶肆虐天倫及禍糾合義旅將雪家冤曰紂可伐不期而會龍躍樊漢電擊湘郢剪離德如振槁取獨夫如拾遺其雄才大略固無得而稱矣旣縣白旗之首方應皇天之眷布德施惠悅近來遠開蕩蕩之王道華靡靡之商

俗大脩文教盛飾禮容鼓扇玄風闡揚儒業介胄仁義折
衝導俎聲振寰宇澤流遐裔干戈載戢凡數十年濟濟焉
洋洋焉魏晉以來未有若斯之盛也然不能息末敦本斷
彫為樸慕名好事崇尚浮華抑揚孔墨流連釋老或終夜
不寢或日旰不食非弘道以利物惟飾智以驚愚且心未
遺榮虛廁倉頭之位高談脫屣終戀黃屋之尊夫人之大
欲在乎飲食男女至於軒冕殿堂非有切身之急高祖屏
除嗜欲眷戀軒冕得其所難而滯於所易可謂神有所不
達智有所不通矣逮夫精華稍竭鳳德已衰惑於聽受權
在奸佞儲后百辟莫能盡言險躁之心暮年逾甚見利而

動懷諫達卜開門揖盜棄好卽讎釁起蕭牆禍成戎羯身
殞非命災被億兆衣冠斃鋒鏑之下老幼粉戎馬之足瞻
彼忝離痛深周廟永言麥秀悲甚殷墟自古以安為危旣
成而敗顛覆之速書契所未聞也易曰天之所助者順人
之所助者信高祖之遇斯屯剝不得其死蓋動而之險不
由信順失天人之助其能免於此乎太宗敏叡過人神采
秀發多聞博達富贍詞藻然文艷用寡華而不實體窮淫
麗義罕踈通哀思之音遂移風俗以此而貞萬國異乎周
誦漢莊矣我生不辰載離多難桀逆構扇巨猾滔天始同
牖里之拘終類望夷之禍悠悠蒼昊其可問哉昔國步初

屯兵纏魏闕群后釋位投袂勤王元帝以盤石之宗受分
陝之任屬君親之難居連率之長不能撫劍嘗膽枕戈泣
血躬先士卒致命前驅遂乃擁衆逡巡內懷歛望坐觀國
變以為身幸不急莽卓之誅先行昆弟之戮又沈猜忍酷
多行無禮騁智辯以飾非肆忿戾以害物爪牙重將心膺
謀臣或顧眄以就拘囚或一言而及殄醢朝之君子相顧
慄然自謂安若太山筭無遺策怵於邪說即安荆楚雖元
惡克翦社稷未寧而西隣責言禍敗旋及斯乃上靈降鑒
此焉假手天道人事其可誣乎其篤志藝文採浮華而棄
忠信戎昭果毅先骨肉而後寇讎口誦六經心通百氏有

仲尼之學有公旦之才適足以益其驕矜增其禍患何補
金陵之覆沒救江陵之滅亡哉敬帝遭家不造紹茲屯運
征伐有所自出政刑不由於已時無伊霍之輔焉得不為
高讓歟

梁本紀下第八

南史八

陳本紀上第九

南史九

李

延壽

陳高祖武皇帝諱霸先字興國小字法生吳興長城下若里人姓陳氏其本甚微自云漢太丘長寔之後也寔玄孫晉太尉準準生匡匡生達永嘉中南遷為丞相掾太子洗馬出為長城令悅其山水遂家焉嘗謂所親曰此地山川秀麗當有王者興焉二百年後我子孫必鍾斯運達生康復為丞相掾咸和中土斷故為長城人康生盱台太守英英生尚書郎公弼公弼生步兵校尉鼎鼎生散騎侍郎高生懷安令詠詠生安成太守猛猛生太常卿道巨道巨

生皇考文讚帝以梁天監二年癸未歲生少儻有大志
長於謀略意氣雄傑不事生產及長涉獵史籍好讀兵書
明緯候孤虛遁甲之術多武藝明達果斷為當時推服身
長七尺五寸日角龍顏垂手過膝嘗游義興館於許氏夢
天開數文有四人朱衣捧日而至納之帝口及覺腹內猶
熱帝心獨喜初仕鄉為里司後至建鄴為油庫吏徙為新
諭侯蕭映傳教勤於其事為映所賞及映為吳興太守甚
重帝謂僚佐曰此人將來遠大必勝於我及映為廣州帝
為中直兵參軍隨之鎮映令帝招集士馬先是武林侯蕭
諮為交州刺史以嚴刻失和土人李賁連結數州豪傑同

時反臺遣高州刺史孫罔新州刺史盧子雄將兵擊賁罔等不時進皆於廣州伏誅子雄弟子略與罔子姪及其主帥杜天合杜僧明共舉兵執南江督護沈顗進寇廣州晝夜苦攻州中震恐帝率精兵救之賊衆大潰僧明後有功業遂降梁武帝深歎異焉授直閤將軍封新枋縣子仍遣圖帝貌而觀之其年冬蕭映卒明年帝送喪還至大庾嶺會有詔以帝為交州司馬與刺史楊暕南討帝益招勇敢器械精利暕委帝經略時蕭勃為定州刺史於西江相會勃知軍士憚遠役因詭說留暕集諸將問計帝曰交趾叛換罪由宗室節下奉辭伐罪故當死生以之於是鼓行

而進軍至交州。驃推帝為前鋒，所向摧陷。賁竄入屈獠洞中。屈獠斬賁傳首建鄴。是歲，太清元年也。賁兄天寶遁入九真，與劫帥李紹隆收餘兵，殺德州刺史陳文戒，進圍愛州。帝討平之。除西江督護高要太守督七郡諸軍事。二年冬，侯景寇逼，帝將赴援廣州刺史元景仲。陰將圖帝，帝知之，與成州刺史王懷明等集兵於南海，馳檄以討景。仲景仲縊於閣下。帝迎蕭勃鎮廣州。時臨賀內史歐陽頔監衡州、蘭谿、蘭京、禮扇，誘始興等十郡共攻頔。頔請援於勃。勃令帝救之。悉禽谿等，仍監始興郡事。帝遣杜僧明、胡頔將二千人頓于嶺上，并厚結始興豪傑，同謀義舉。侯安都、張

偲等率衆來附蕭勃聞之遣鍾休悅說停帝帝泣謂休悅
曰君辱臣死誰敢愛命僕行計決矣時蔡路養起兵據南
康勃遣腹心譚世遠為曲江令與路養相結同遏義軍大
寶元年正月帝發始興次大庾嶺大破路養軍進頓南康
湘東王繹承制授帝交州刺史改封南野縣伯於是脩理
崎頭古城徙居之劉惠騫等望見恒有紫氣冒城上遠近
驚異故惠騫等深自結於帝尋改封長城縣侯南江州刺
史時寧都人劉藹等資高州刺史李遷仕舟艦兵仗將襲
南康帝遣杜僧明等據白口禦之二年僧明禽遷仕送南
康斬之承制授帝江州刺史帝發南康瀨石舊有二十四

難灘多巨石行旅以為難帝之發水暴起數丈三百里間
巨石皆沒進軍頓西昌有龍見水濱高五丈五采鮮曜軍
人觀者數萬人帝又嘗獨坐胡牀於閣下忽有神光滿閣
廊廡之間並得相見趙知禮侍側恠而問帝帝笑不荅時
承制遣征東將軍王僧辯督衆軍討侯景次盆城帝率杜
僧明等合三萬將會焉時西軍乏食帝先計軍糧五十萬
石至是分三十萬石以資之仍頓巴丘會侯景廢簡文立
豫章嗣王棟帝遣兼長史沈褒奉表於江陵勸進承制授
帝東揚州刺史領會稽太守三年帝帥師發自豫章二月
次桑落洲時僧辯已發盆城會帝于白茅灣乃登岸結壇

刑牲盟約進次大雷軍人杜稜夢雷池君周何神自稱征討大將軍乘朱航陳甲仗稱下征侯景須臾便還云已殺景竟三月帝與諸軍進剋姑熟仍次蔡洲侯景登石頭城望官軍之盛不悅曰一把子人何足可打密謂左右曰此軍上有紫氣不易可當乃以舫舫貯石沈塞淮口緣淮作城自石頭迄青溪十餘里中樓雉相接僧辯遣杜顗問計於帝帝以諸將不敢當鋒請先往立柵即於石頭西橫壠築柵衆軍次連八城直出東北賊恐西州路斷亦於東北果林作五城以遏大路帝曰善用兵者如常山之蛇使救首救尾困而無暇今我師旣衆賊徒甚寡應分賊兵力以

弱制疆乃命諸將分處置兵帝與王琳杜龕等悉力乘之
景衆大潰僧辯啓命帝鎮京口五月齊遣將辛術圍嚴超
達摩秦郡帝命徐度領兵助其固守齊衆起土山穿地道
攻之甚急帝乃自率萬人解其圍振旅南歸承制授帝征
北大將軍開府儀同三司南徐州刺史進封長城縣公及
王僧辯征陸納於湘州承制命帝代鎮楊州承聖二年湘
州平帝旋鎮京口三年三月進帝位司空及魏平江陵帝
與王僧辯等進啓請晉安王以太宰承制十二月晉安王
至自尋陽入居朝堂給帝班劍二十人四年五月齊送貞
陽侯明還主社稷王僧辯納之明即位改元天成以晉安

王為皇太子初齊之納貞陽也帝固爭之以為不可不見
從帝居常憤歎曰嗣主高祖之孫元皇之子竟有何辜坐
致廢黜假立非次此情可知乃密具袍數千領及錦綵金
銀以為賞賜之資九月壬寅帝召徐度侯安都周文育仍
部列將士水陸俱進夜發南徐州討王僧辯甲辰帝至石
頭前遣勇士自城北踰入時僧辯方視事聞外白有兵遽
走帝大兵尋至因風縱火僧辯就禽是夜縊之及其子頴
於是廢貞陽侯而奉晉安王即位改承聖四年為紹泰元
年壬子詔授帝侍中大都督中外諸軍事車騎將軍楊南
徐二州刺史持節司空班劔鼓吹並如故仍詔甲仗百人

出入殿省震州刺史杜龕據具興與義興太守韋載舉兵
逆命辛未帝表自東討留高州刺史侯安都右州刺史杜
陵宿衛臺省甲戌軍至義興秦州刺史徐嗣徽據城入齊
又要南豫州刺史任約舉兵應龕齊人資其兵食嗣徽乘
虛奄至闕下侯安都出戰嗣徽等退據石頭丁丑載及龕
從弟北叟來降帝撫而釋之仍以載兄鼎知郡事以嗣徽
寇逼卷甲還都命周文育進討杜龕十一月己卯齊遣兵
五千度據姑熟又遣安州刺史程子崇楚州刺史劉士榮
淮州刺史柳達摩領兵萬人於胡墅度米粟三萬石馬千
匹入石頭帝乃遣侯安都領水軍夜襲胡墅燒齊船周鐵

武率舟師斷齊運輸帝領鐵騎自西明門襲之齊人大潰
嗣徽留達摩等守城自率親屬腹心往南州採石以迎齊
援先是太白自十一月丙戌不見十二月乙卯出于東方
丙辰帝盡命衆軍分部甲卒對治城日立航度兵攻其水
南二柵柳達摩等度淮置陣帝督兵疾戰縱火燒柵煙塵
漲天齊人大潰盡收其船艦是日嗣徽約等領齊兵還據
石頭帝遣侯安都領水軍襲破之嗣徽等單舸脫走丁巳
拔石頭南岸柵移度北岸起柵以絕其汲路又堙塞東門
故城中諸井齊所據城中無水水一合賀米一升一升米
賀絹一匹或炒米食之達摩謂其衆曰頃在北童謠云石

頭擣兩檔擣青復擣黃侯景服青已倒於此今吾徒衣黃
豈謠言驗邪庚申達摩遣侯子欽劉士榮等請和帝許之
乃於城外盟約其將士恣其南北辛酉帝出石頭南門陳
兵送齊人歸北者及至齊人殺之壬戌齊和州長史烏丸
遠自南州奔還歷陽江寧令陳嗣黃門侍郎曹朗據姑熟
不從帝命侯安都徐度等討平之聚其首為京觀是月杜
龕以城降二年正月癸未誅龕其弟翕從弟北叟司馬沈
孝敦並賜死三月戊戌齊遣水軍儀同蕭軌庫狄伏連堯
難宗東方老侍中裴英起東廣州刺史獨孤辟惡洛州刺
史李希光并任約徐嗣徽王僧愔等衆十萬出柵口向梁

山帳內盪主黃叢逆擊敗之燒其前軍船艦齊頓軍保蕪湖五月丙申齊兵至秣陵故城己亥帝率宗室王侯及朝臣於大司馬門外白虎闕下刑牲告天以齊人背約發言慷慨涕泗交流士卒觀者益奮辛丑齊軍於秣陵故城跨淮立橋柵引度兵馬癸卯自方山進及兜塘游騎至臺都下震駭帝潛以精卒三千配沈泰度江襲齊行臺趙彥深於瓜步獲其舟粟六月甲辰齊兵潛至鍾山龍尾丁未進至莫府山帝遣錢明領水軍出江乘要擊齊人糧運盡獲之齊軍大餒殺馬驢而食之壬子齊軍至玄武湖北莫府山南將據北郊壇衆軍自覆舟東移頓郊壇北與齊人

相對其夜大雨震電暴風拔木平地水丈餘齊軍晝夜坐
立泥中縣南以饜足指皆爛而臺中及潮溝北水退路燥
官軍每得番易甲寅少霽是時食盡調市人餽軍皆是麥
屑為飯以荷葉裹而分給間以麥餅兵士皆困會文帝遣
送米三千石鴨千頭帝即炊米煮鴨誓申一戰士及防身
計糧數斂人人裹飯媿以鴨肉帝命衆軍蓐食攻之齊軍
大潰執嗣徽及其弟嗣宗斬之以徇虜蕭軌東方老王敬
寶李希光裴英起王僧智等將帥四十六人其軍士得窠
至江者縛筏以濟中江而溺流屍至京口者彌岸惟任約
王僧愔獲免先是童謡云虜萬夫入五湖城南酒家使虜

奴自晉宋以後經絳在魏境江淮以北南人皆謂為虜衆
時以賞俘質酒者一人裁得一醉丁巳衆軍出南州燒賊
舟已未斬劉歸義徐嗣產傳野猪于建康市是日解嚴庚
申誅蕭軌東方老王敬寶李希光裴英起等太平元年九
月壬寅帝進位丞相錄尚書事鎮衛大將軍揚州牧進封
義興郡公庚申追贈皇考侍中光祿大夫封義興郡公謚
曰恭十月甲戌梁帝敕丞相自今問訊可施別榻以近宸
坐二年正月壬寅詔加帝班劍十人并前為三十丁未詔
贈皇兄道談南兖州刺史長城縣公謚曰昭烈皇弟休光
侍中南徐州刺史武康縣侯謚曰忠壯甲寅遣兼侍中謁

者僕射陸繕策拜長城縣夫人章氏為義興國夫人丁卯
詔贈皇祖侍中太常卿謚曰孝追封皇祖妣許氏吳郡嘉
興縣君謚曰敬皇妣張氏義興國太夫人謚曰宣二月庚
午蕭勃舉兵自廣州度嶺頓南康遣其將歐陽頔傅泰及
其子孜為前軍至豫章分屯要險南江州刺史余孝頃起
兵應勃帝命周文育侯安都率眾討平之八月甲午帝進
位太傅加黃鉞劍履上殿入朝不趨贊拜不名丙申加前
後部羽葆鼓吹是時湘州刺史王琳擁兵不應命遣周文
育侯安都率眾討之九月辛丑梁帝進帝位相國摠百揆
封十郡為陳公備九錫之禮加璽綬遠游冠綠綬綬位在

諸侯王上策曰大哉乾元資日月以貞觀至哉坤元憑山
川以載物故惟天爲大陟配者欽明惟王建國翼輔者齊
聖是以文武之佐礩谿蘊其玉璜堯舜之臣滎河鑊其金
板況乎體得一之鴻姿寧陽九之危危援橫流於碣石撲
燎火於崑岡驅馭於韋彭踳躐於齊晉神功行而靡用聖
道運而無名者乎今將授公典策其敬聽朕命日者昊天
不弔鍾亂于我國家網漏吞舟彊胡內鼎茫茫宇宙惻惻
黎元方趾圓顙萬不遺一太清否亢橋山之痛以深大寶
屯如平陽之禍相繼上宰膺違康救黔黎鞠旅於溟池之
南揚旌於桂嶺之北縣三光於已墜謚四海於群飛光啓

中興此則公之大造於皇家者也既而天未悔禍夷醜荐臻南夏崩騰西京蕩覆家司昏撓旁引寇讎既見貶於桐官方謀危於漢閣皇運已殆何殊贅旒中國搖然非徒如綫公赫然投袂匡救本朝復營齊都平戎王室朕所以還膺寶曆重履宸居挹建武之風猷歌宣王之雅頌此又公之再造於皇家者也公應務之初登庸惟始孫盧肇疊疊越貊爲災番部貼危勢將淪殄公赤旗所指杖壘洞開白羽纔搗凶徒粉潰此又公之功也大同之末邊政不脩李賁狂迷竊我交愛公英薨雅筭電掃風行馳御樓船直跨滄海三山獠洞八角蠻陬迖矣水寓之鄉悠哉火山之國馬

援之所不屆陶璜之所未開莫不懼我王靈爭朝邊侯歸
蹶天府獻狀鴻臚此又公之功也自寇虜陵江宮闈幽辱
而番禺連率本自諸夷言得其朋是懷同惡公仗此忠誠
乘機勦定執沛令而釁鼓平新野而據鞏此又公之功也
世道初艱方隅多難公以國盜邊警知無不爲恤是同盟
誅其醜類南土黔黎重保蘇息此又公之功也長驅嶺嶠
夢想京畿緣道酋豪遮爲榛梗路養渠帥全據大都蓄聚
逋逃方謀阻亂公龍驤虎步嘯吒風雲山靡堅城野無彊
陣清氛氛於瀨石滅沴氣於雩都此又公之功也遷仕凶
慝屯據大阜乞活類馬騰之軍流入多杜弼之衆公坐揮

三略遙制六奇義勇同心貔貅騁力雷奔電擊谷靜山空
列郡無犬吠之驚叢祠罷狐鳴之盜此又公之功也王師
討虜次屆淪波兵乏兼儲士有飢色公回麾彭蠡積穀巴
丘億庾之詠斯豐虛聚之吐是衆故使三軍勇銳百戰無
前承此兵糧遂殄凶逆此又公之功也盆壘猜攜用淹戎
略公志惟同獎師克在和屈禮交盟神祇感咽故能使舟
師並路遠邇萌心此又公之功也姑熟襟要嶠函所憑寇
虜據其關梁大盜負其肩鏑公一校纔撓三雄並奮左賢
右角沙潰土崩鄂坂之隘斯開夷庚之道無塞此又公之
功也義軍大衆俱集帝京逆豎凶徒猶屯皇邑公回茲地

軸抗此天羅曾不崇朝俾無遺噍此又公之功也內難初
靜諸侯出關外郡傳烽鮮卑犯塞公舟師步甲亘野橫江
殲厥羣臣遂殫封豕此又公之功也公克黜禍難劬勞皇
室而孫寯之黨翻啓狄人伊洛之間咸為虜戍朝闇戎塵
夜喧胡鼓公三籌既畫八陣斯張裁舉靈鉦亦抽金僕咸
俘醜類悉反高墉此又公之功也任約叛渙棗聲不悛戎
羯貪婪狼心無改公左甄右落箕張翼舒掃是攬槍驅其
獫狁投秦阬而盡沸噓渚水而不流此又公之功也一相
居中自折彝鼎五湖小守妄懷同惡公夙駕兼道衣製杖
戎玉斧將揮金鉦且戒袂酋震懼遽請灰釘此又公之功

也賊龕凶橫陵虐具區阻兵安忍憑災怙亂公雖宗居汝
潁世寓東南眷言桑梓公私憤切戮此大憝如烹小鮮此
又公之功也同姓有扈頑凶不賓憑藉宗盟圖危社稷公
論兵於廟堂之上決勝於尊俎之間寇賈樊滕浮江下瀨
一朝翦撲無待旬師此又公之功也豫章祇冠依憑山澤
繕甲完聚多歷歲時結從連橫爰洎交廣呂嘉旣獲吳淠
已縱命我還師征其不恪連營盡拔偽黨斯禽此又公之
功也自八紘九野瓜剖豆分竊帝偷王連州比縣公武靈
已暢文德又宣折簡馳書風猷斯遠此又公之功也京師
禍亂亟積寒暄變闕低昂九門寥豁公求衣昧旦仄食高

春興構宮闈具瞻遐邇郊庠宗稷之典六符十等之章還
聞太始之風流重覩永平之遺事此又公之功也公有濟
天下之勲重之以明德凝神體道合德符天周百姓以為
心隨萬機以成務上德不德無為以為夏長春生顯仁藏
用功成化洽樂奏咸雲安上御人禮兼文質是以天無蘊
寶地有呈祥既景煥於圖書方歲黷於史牒高勲踰於象
緯積德冠於蒿華固無得而稱者矣朕又聞之前王宰世
茂賞尊賢式樹藩長摠征羣伯二南崇絕四履遐曠泱泱
表海祚土維齊巖巖泰山俾侯于魯況復經營宇宙寧惟
斷鼇足之功弘濟蒼生非直鑿龍門之險而疇庸報德寂

爾無聞朕所以垂拱當宇載懷慙悸者也今授公相國以
南豫州之陳留南丹楊宣城揚州之吳興東陽新安新寧
南徐州之義興江州之鄱陽臨川十郡封公為陳公錫茲
青土苴以白茅爰定爾邦用建冢社昔奭分陝俱為保
師晉鄭諸侯咸作卿士兼其內外禮實攸宜今命使持節
兼太尉王通授相國印綬陳公璽紱使持節兼司空王瑒
授陳公茅土金武符第一至第五左竹使符第一至第十
左相國秩踰三鉉任摠百司位絕朝班禮由事革以相國
摠百揆除錄尚書之號上所假節侍中貂蟬中書監印章
中外都督太傅印綬義興公印策其鎮衛大將軍揚州牧

如故又加公九錫其敬聽後命以公禮為楨榦律等銜策
四維皆舉八柄有章是用錫公大輅戎輅各一玄牡二駟
以公賤寶崇敷疏爵待農室富京坻人知榮厚是用錫公
衮冕之服赤舄副焉以公調理陰陽燮諧風雅三靈允降
萬國同和是用錫公軒縣之樂六佾之儔以公宣導王猷
弘闡風教光景所照覲象必通是用錫公朱戶以居以公
抑揚清濁褒德進賢髦士盈朝幽人虛谷是用錫公納陛
以登以公巍然廊廟為世銘範折衝四表臨御八荒是用
錫公武賁之士三百人以公軌茲明罰期在刑厝象恭無
赦千紀必誅是用錫公斧鉞各一以公英猷遠量踰厲嵩

滇包一車書括囊囊寓是用錫公彤弓一彤矢百盧弓十
盧矢十以公天經地義貫徹幽明春露秋霜允供采盛是
用錫公秬鬯一卣圭瓚副焉陳國置丞相以下一遵舊式
往欽哉其恭循朕命克相皇天弘建邦家允興鴻業以光
我高祖之休命十月戊辰又進帝爵為王以揚州之會稽
臨海永嘉建安南徐州之晉陵信安江州之尋陽豫章安
成廬陵并前為二十郡益封陳國其相國揚州牧鎮衛大
將軍並如故又命陳王晃十有二旒建天子旌旗出轂入
蹕乘金根車駕六馬備五時副車置旄頭雲罕樂僂八佾
設鍾虡宮縣王妃王子王女爵命之號陳臺百官一依舊

典辛未梁帝禪位于陳策曰咨爾陳王惟昔上古厥初生
人驪連栗陸之前容成大庭之世杳冥恍忽故靡得而詳
焉自羲農軒昊之君陶唐有虞之主或垂衣而御四海或
無為而子萬姓居之如馭朽索去之如脫弊屣裁遇許由
便能捨帝暫逢善卷即以讓王故知玄扈璇璣非關尊貴
金根玉輅示表君臨及南觀河渚東沈刻璧菁華旣竭毫
勤已倦則抗首而笑惟賢是與謗然作歌簡能斯授遺風
餘烈昭晰圖書漢魏因循是為故實宋齊授受又弘斯義
我高祖應期撫運握樞御宇三后重光祖宗齊聖及時屬
陽九封豕荐食西都失馭夷狄交侵乃聚天成輕筭龜鼎

慄慄黔首若崩厥角徽徽皇極將甚綴旒惟王乃聖乃神
欽明文思二儀並運四時合序天錫智勇人挺雄傑珠庭
日角龍行虎步爰初投袂日廼勤王電掃蚩蚩雲撤彭蠡
翦其元惡定我京畿及王賀帝弘質茲冠履旣行伊霍用
保冲人震澤稽塗竝懷叛逆撫羯醜虜三亂皇都裁命偏
師二邦自殄薄伐獫狁六戎盡殪嶺南叛換湘郢連結賊
帥旣禽凶渠傳首用能百揆時序四門允穆無思不服無
遠不届上達穹昊下漏深泉蛟魚並見謳歌攸屬況乎長
孳橫天已微布新之兆璧日斯旣寔表更姓之符七百無
常期皇王非一族昔木德旣季而傳祚于我有梁天之歷

數允集明哲式遵前典廣詢群議王公卿尹莫不攸屬敬
從人祇之願授帝位于爾躬四海困窮天祿永終王其允
執厥中軌儀前式以副溥天之望禋郊祀帝時膺大禮永
固洪業豈不盛與又命璽書遣兼太保尚書左僕射王通
兼太尉司徒左長史王瑒奉皇帝璽紱受終之禮一依唐
虞故事是日梁帝遜于別宮帝謙讓再三群臣固請乃許之
永定元年冬十月乙亥皇帝即位于南郊柴燎告天曰皇
帝臣霸先敢用玄牡昭告于皇皇后帝梁氏以圯剝荐臻
歷運有極欽若天應以命于霸先夫肇有黎蒸乃樹司牧
選賢與能未常厥姓有梁末運仍葉邁屯獫醜憑陵久移

神器承聖在外非能祀夏天未悔禍復羅寇逆嫡嗣廢黜
宗枝僭詐天地板蕩紀綱泯絕霸先爰初投袂大拯橫流
重舉義兵實戡多難廢王立帝寔有厥功安國定社用盡
其力是謂小康方期大道旣而煙雲表色日月呈祥除舊
布新旣彰玄象遷虞事夏且協謳謌九域八荒同布衷款
百神群祀皆有誠願梁帝高謝萬邦授以大寶霸先自惟
菲薄讓德不嗣至于再三辭弗獲許僉以百姓須王萬機
難曠皇靈眷命非可謙拒畏天之威用膺嘉祚求言夙志
能無慙德敬簡元辰升壇受禪告類上帝用荅眚心永保
于我有陳惟明靈尚饗先是氛霧雨雪晝夜晦冥至是日

景氣清晏禮畢輿駕還宮臨太極前殿大赦改元賜百姓
爵二級文武二等鰥寡孤獨不能自存者人穀五斛逋租
宿責皆勿復收有犯鄉論清議贓污淫盜者皆洗除先注
與之更始其長徒敕繫特皆原之士官失爵禁錮奪勞一
依舊典又詔以江陰郡奉梁主爲江陰王行梁正朔車旗
服色一依前準梁皇太后爲江陰國太妃皇后爲江陰國
妃又詔百司各依位攝職丙子幸鍾山祭蔣帝廟戊寅幸
華林園覽辭訟臨赦囚徒已卯分遣大使宣勞四方庚辰
詔出佛牙於杜姥宅集四部設無遮大會辛巳追尊皇考
曰景皇帝廟號太祖皇妣董太夫人曰安皇后前夫人錢

氏爲昭皇后世子克爲孝懷太子立夫人章氏爲皇后癸未尊景帝陵曰瑞陵昭皇后陵曰嘉陵依梁初園陵故事立刪定郎刊定律令戊子遷景皇帝神主祔于太廟是月西討都督周文育侯安都於郢州敗績沒于王琳十一月丙申封皇兄子長城縣侯禧爲臨川郡王頊襲封始興郡王皇弟子曇朗襲封南康郡王庚申都下火十二月庚辰皇后謁太廟是歲周閔帝元年及九月冢宰宇文護廢閔帝而奉明帝又爲明帝元年

二年春正月乙未以車騎將軍開府儀同三司侯瑱爲司空辛丑祀南郊大赦甲寅遣中書舍人韋鼎策具興楚王

神爲帝戊午祀明堂二月壬申南豫州刺史沈泰奔齊辛卯詔司空侯瑱督水陸衆軍以禦齊三月王琳立梁永嘉王蕭莊以奉梁後即位于郢州夏四月甲子祀太廟乙丑江陰王殂陳志也追謚梁敬帝詔太宰弔祭司空監護喪事以梁武林侯蕭諮子季卿嗣爲江陰王戊辰重雲殿東鷄尾有紫煙屬天五月乙未都下地震壬寅立梁邵陵攜王廟室祭以太牢辛酉帝幸太莊嚴寺捨身壬戌群臣表請還宮六月己巳詔司空侯瑱領軍將軍徐度討王琳初侯景之平也太極殿被焚承聖中議欲營之獨闕一柱秋七月有樟木大十八圍長四丈五尺流泊陶家後渚監

軍鄒子度以聞詔中書令沈衆兼起部尚書構太極殿八月周文育侯安都等於王琳所逃歸自劾廷尉即日引見宥之並復本官丁亥加江州刺史周迪平南將軍開府儀同三司冬十月庚午遣鎮南將軍周文育都督衆軍出豫章討余孝勣乙亥幸莊嚴寺發金光明經題丁酉加高州刺史黃法氈平南將軍開府儀同三司十二月甲子幸大莊嚴寺設無算大會捨乘輿法物羣臣備法駕奉迎即日還宮丙戌加北江州刺史熊曇朗平西將軍開府儀同三司三年春正月丁酉鎮南將軍廣州刺史歐陽頔即本號開府儀同三司是夜大雪及旦太極殿前有龍跡見甲子廣

州言仙人見于羅浮山寺小石樓二月辛酉加平西將軍
桂州刺史淳于量鎮西大將軍開府儀同三司夏閏四月
甲午詔依前代置西省學士兼取伎術士是時久不雨丙
午幸鍾山祭蔣帝廟是日降雨迄于月晦五月丙辰朔日
有蝕之有司奏舊儀帝御前殿服朱紗褰通天冠詔曰此
乃前代承用意有未同合朔仰助太陽宜備袞冕之服自
今亦可爲準丙子扶南國遣使朝貢乙酉北江州刺史熊
曇朗殺都督周文育舉兵反王琳遣其將常衆愛曹慶率
兵援余孝勳六月戊子儀同侯安都敗衆愛等於左里獲
琳從弟襲主帥羊賦等四十餘人衆愛遁走庚寅廬山人

斬之傳首建鄴甲午衆軍凱歸丁酉帝不豫遣兼太宰尚書右僕射王通以疾告太廟兼太宰中書令謝哲告大社南北郊辛丑帝小瘳故司空周文育之柩至自建昌壬寅帝素服哭于朝堂哀甚癸卯上臨訊獄訟是夜熒惑在天尊上疾甚丙午帝崩于璿璣殿時年五十七遺詔追臨川王倩入續大業甲寅殯于太極殿西階八月甲午羣臣上謚曰武皇帝廟號高祖丙申葬萬安陵帝雄武多英略性甚仁愛及居阿衡恒崇寬簡雅尚儉素常膳不過數品私饗宴曲皆瓦器蟠盤肴核庶羞裁令充足不為虛費初平侯景及立敬帝子女玉帛皆班將士其充闡房者衣不重

采飾無金翠聲樂不列於前踐祚之後彌厲恭儉故能隆功茂德光于江左云

世祖文皇帝諱禧字子華始興昭烈王之長子也少沈敏有識量美容儀留意經史武帝甚愛之常稱吾家英秀染太清初帝夢兩日闕一大一小大者光滅墜地色正黃其大如斗帝三分取一懷之侯景之亂避地臨安縣郭文舉舊宅及武帝舉兵南下景遣吳興太守信都遵收帝及衡陽獻王出都帝乃密袖小刀候見景欲圖之及至以付郎中王翻幽守故其事不遂武帝圍石頭景欲加害者數矣會景敗乃得出起家吳興太守武帝之討王僧辯也先召

帝與謀時僧辯壻杜龕據吳興兵衆甚盛武帝密令帝還
長城立柵備之龕遣將杜泰乘虛掩至將士相視失色帝
言笑自若部分益明於是衆心乃定及武帝遣周文育討
龕帝遣將軍劉澄蔣元舉攻下龕拜會稽太守武帝受禪
立為臨川王夢梁武帝以寶刀授已周文育侯安都之敗
於沌口武帝詔帝入樞軍政尋命率兵城南皖永定三年
六月丙午武帝崩皇后稱遺詔徵帝入纂皇統甲寅至自
南皖入居中書省皇后令帝嗣膺寶錄帝辭讓至于再三
公卿固請其日即皇帝位於太極前殿大赦詔州郡悉停
奔赴秋七月丙辰尊皇后為皇太后辛酉以司空侯瑱為

太尉以南豫州刺史侯安都為司空以南徐州刺史徐度
為侍中中撫軍將軍開府儀同三司乙丑重雲殿災八月
庚戌立皇子伯茂為始興王奉昭烈王後徙封始興嗣王項
為安成王九月辛酉立皇子伯宗為皇太子王公以下賜
帛各有差乙亥立妃沈氏為皇后冬十月甲子齊文宣帝
殂十一月乙卯王琳寇大雷詔太尉侯瑱司空侯安都儀
同徐度禦之是歲周明帝改天王稱皇帝復建年號曰武
成元年

天嘉元年春正月癸丑大赦改元詔賜鰥寡孤獨不能自
存者人粟五斛孝悌力田殊行異等加爵一級甲寅分遣

使者宣勞四方辛酉祀南郊詔賜人爵一級二月丙申太尉侯瑱敗王琳于梁山敗齊兵于博望禽齊將劉伯球王琳及其主蕭莊奔齊庚子分遣使者齎璽書宣勞四方乙巳遣太尉侯瑱鎮益城庚戌立武帝第六子昌為衡陽王三月丙辰蕭莊所署郢州刺史孫瑒舉州內附丁巳江州刺史周迪平南中斬賊帥熊曇朗傳首建鄴戊午齊軍棄魯山城走詔南豫州刺史程靈洗守之丙子衡陽王昌沈于江夏四月丁亥立皇子伯信為衡陽王奉獻王後辛丑周明帝崩六月辛巳改謚皇祖妣景安皇后曰景文皇后壬辰詔改葬梁元帝於江寧舊塋車騎禮章悉同梁典仍

依魏葬漢獻帝故事甲午追策故始興昭烈王妃曰孝妃
辛丑國哀周忌上臨于太極前殿百僚陪哭赦建鄴殊死
以下秋七月丙辰立皇子伯山爲鄱陽王八月壬午齊孝
昭帝廢太子殷而自立戊子詔非兵器及國容所須金銀
珠玉衣服雜玩悉皆禁斷丁酉幸正陽堂閱武九月癸丑
彗星見乙卯周將獨孤盛領水軍趣巴湘與賀若敦水陸
俱進太尉侯瑱自尋陽禦之冬十月癸巳侯瑱襲破獨孤
盛於楊葉洲盛登岸築城自保丁酉詔司空侯安都率衆
會侯瑱南拒周軍十二月己亥周巴陵城主尉遲憲降庚
子獨孤盛潛遁走

二年春正月庚戌大赦辛未周湘州城主殷亮降湘州平
二月庚寅曲赦湘州諸郡三月乙卯太尉湘州刺史侯瑱
薨夏六月己亥齊人通好秋七月丙午周將賀若敦遁歸
武陵天門南平義陽河東宜都郡悉平九月甲寅詔以故
太尉侯瑱故司空周文育故開府儀同三司杜僧明故中
護軍胡穎故領軍陳擬配食武帝廟庭冬十月癸丑霍州
西山蠻率部內屬乙卯高麗國遣使朝貢十一月甲辰齊
孝昭帝殂十二月甲申立始興國廟于都下用王者禮以
國用不足立煮海鹽傳及榷酤科先是縉州刺史留異應
王琳丙戌詔司空侯安都討之是歲周武帝保定元年

三年春正月庚戌設帷宮於南郊幣告胡公以配天辛亥
祀南郊詔賜人爵一級孝悌力田加等二月梁宣帝殂
閏月己酉以百濟王餘明為撫東大將軍高麗王高湯為
寧東將軍江州刺史周迪舉兵應留異甲子改鑄五銖錢
三月丙子安成王瑱至自周丁丑以安右將軍吳明徹為
安南將軍江州刺史督衆軍南討甲申大赦庚寅司空侯
安都破留異於姚支嶺異奔晉安東陽郡平夏四月癸卯
曲赦東陽郡乙巳齊人來聘秋七月己丑皇太子納妃王
氏在位文武賜帛各有差孝悌力田為父後者賜爵二級
九月戊辰朔日有蝕之以待中到仲舉為尚書右僕射丁

亥周迪請降

四年春正月丙子平阡利國遣使朝貢甲申周迪走投閩
州刺史陳寶應納之夏四月辛丑設無筭大會捨身於太
極前殿乙卯加驃騎將軍揚州刺史安成王瑱開府儀同
三司六月癸巳司空侯安都賜死秋九月壬戌開府儀同
三司廣州刺史歐陽頠薨癸亥曲赦都下辛未周迪復寇
臨川詔護軍將軍章昭達討平之冬十二月丙申大赦詔
昭達進軍建安討陳寶應

五年春三月壬午詔以故護軍將軍周鐵武配食武帝廟
庭夏五月周齊並遣使來聘秋七月丁丑曲赦都下九月

城西城冬十一月己丑章昭達禽陳寶應留異送建鄴晉
安郡平甲辰以護軍將軍章昭達爲鎮軍將軍開府儀同
三司十二月甲子曲赦建安晉安二郡討陳寶應將士死
王事者並給棺槨送還本鄉并復其家癸未齊人來聘

六年春正月甲午皇太子加元服王公以下賜帛各有差
孝悌力田爲父後者賜爵一級鰥寡孤獨不能自存者穀
人五斛夏四月甲寅以開府儀同三司揚州刺史安成王
頊爲司空五月齊武成帝傳位於太子緯自號太上皇帝
六月辛酉彗星見于上台北周人來聘秋七月癸未有大
風自西南至廣百餘步激壞靈臺候樓甲申儀賢堂無故

自壞丙戌臨川太守駱牙斬周迪傳首建鄴梟於朱雀航
八月己卯立皇子伯固為新安王伯恭為晉安王伯仁為
廬陵王伯義為江夏王九月新作大航冬十月辛亥齊人
來聘十二月乙卯立皇子伯禮為武陵王癸亥曲赦都下
天康元年春二月丙子大赦改元三月己卯以司空安成
王頊為尚書令夏四月乙卯皇孫至澤生賜在位文武帛
各有差為父後者賜爵一級癸酉皇帝崩于有覺殿遺詔
皇太子可即君臨山陵務存儉速大斂竟群臣三日一臨
公除之制率依舊典六月甲子群臣上謚曰文皇帝廟號
世祖丙寅葬永寧陵文帝起自布衣知百姓疾苦國家資

用務從儉約妙識真偽下不容姦一夜內刺聞取外事分判者前後相續每雞人伺漏傳籤於殿中者令投籤於階石上鏗然有聲云吾雖得眠亦令驚覺其自彊若此云

廢帝諱伯宗字奉業小字藥王文帝嫡長子也梁承聖三年五月庚寅生永定二年二月戊辰拜臨川王卅子三年文帝嗣位八月庚戌立為皇太子自梁室亂離東宮焚燼太子居于永福省天康元年四月癸酉文帝崩是日太子即皇帝位于太極前殿大赦詔内外文武各復其職遠方悉停奔赴五月己卯尊皇太后曰太皇太后皇后曰皇太后庚寅以司空揚州刺史新除尚書令安成王瑱為司徒

錄尚書都督中外諸軍事丁酉以中軍大將軍開府儀同
三司徐度為司空以鎮東將軍東揚州刺史始興王伯茂
為征東將軍開府儀同三司以吏部尚書袁樞為尚書左
僕射以吳興太守沈欽為右僕射秋七月丁酉立妃王氏
為皇后冬十月庚申享太廟十一月乙亥周人來弔十二
月甲子高麗國遣使朝貢是歲周天和元年

光大元年春正月癸酉尚書左僕射袁樞卒乙亥大赦改
元賜孝悌力田爵一級辛卯祀南郊二月辛亥南豫州刺
史余孝頃謀反伏誅三月甲午以尚書右僕射沈欽為侍
中尚書僕射夏五月乙未湘州刺史華皎不從執政丙申

以中撫軍大將軍淳于量爲征南大將軍揔舟師討之六月壬寅以中軍大將軍司空徐度爲車騎將軍揔督都下衆軍自步道襲湘州秋七月戊申立皇子至澤爲皇太子賜天下爲父後者爵一級王公以下賚帛各有差九月丙辰百濟國遣使朝貢是月周將拓拔定入郢州與華皎水陸俱進都督淳于量吳明徹等大破之皎單舸奔江陵禽定送建鄴冬十月辛巳曲赦湘巴二州爲皎所誣誤者十一月甲子中權將軍開府儀同三司王冲薨十二月庚寅以儀同三司兼從事中郎孔英哲爲奉聖亭侯奉孔子祀二年春正月己亥司徒安成王瑱進位太傅領司徒加殊

禮以新除征南大將軍淳于量爲中軍大將軍及安南將軍湘州刺史吳明徹卽本號並開府儀同三司庚子詔討華皎軍人死王事者並給棺槨送還本鄉仍復其家甲子司空徐度薨夏五月丙辰太傅安成王頊獻玉璽一六月丁亥彗星見秋七月戊申新羅國遣使朝貢壬戌立皇弟伯智爲永陽王伯謀爲桂陽王九月林邑狼牙脩國並遣使朝貢冬十一月甲寅慈訓太后令曰伯宗昔在儲宮本無令問及居崇極遂騁凶淫太傅親承顧託義深垣屏而攢塗未御翌日無淹仍遣劉師知殷不佞等顯言排斥陰謀禍亂賴元相維持但除君側又以余孝頃密適京師便

相徵召宗社之靈祇氛是滅於是密詔華皎稱兵上流國
祚憂惶幾移醜類又別敕歐陽紇等攻逼衡州嶺表紛紜
殊淹弦望但賊賢皆亡日望懲改而悖禮忘德情性不悛
盪主侯法喜等大傳麾下恒游府內嗚以深利謀興肘腋
又盪主孫泰等潛相連結大有交通天誘其衷自然開發
此諸文迹今以相示豈可復肅恭禋祀臨御生靈今可特
降爲臨海郡王迭還藩邸太傅安成王固天生德齊聖廣
深二后鍾心三靈佇眷自前朝不豫任揔邦家威惠相宣
刑禮兼設且地彰靈靈天表長彗布新除舊禎祥咸顯文
皇知子之鑒事甚帝堯傳弟之懷久符太伯今可還申舊

志崇立賢君外宜依舊典奉迎輿駕是日帝出居別第太
建二年四月乙卯薨時年十九帝性仁弱無人君之器及
即尊位政刑皆歸冢宰故宣太后稱文帝遺志而廢焉

論曰陳武帝以雄毅之姿屬殷憂之運功存拯溺道濟橫
流應變無方蓋惟人傑及乎西都湯覆江表貼危僧辯任
同伊尹空結桐宮之恨貞陽入假秦兵不息穆嬴之泣帝
乘隙以舉乃蹈玄機王業所基始自於此柴天改物蓋有
憑云文帝以宗枝承統情存兢惕加以崇尚儒術愛悅文
義恭儉行已勤勞濟物志度弘遠有前哲之風至於臨下
明察得求平之政矣臨海懦弱有同於帝摯文后雖欲不

鑒殷道蓋亦其可得邪

陳本紀上第九

南史九

陳本紀下第十

南史十

李

延壽

高宗孝宣皇帝諱瑱字紹世小字師利始興昭烈王第二子也梁中大通二年七月辛酉生有赤光滿室少寬容多智略及長美容儀身長八尺三寸垂手過膝有勇力善騎射武帝平侯景鎮京口梁元帝徵武帝子姪入侍武帝遣帝赴江陵累官為中書侍郎時有軍主李恁與帝有舊每同游處帝嘗夜被酒張燈而寐恁適出尋友乃見帝是大龍便驚走他室魏平江陵遷于長安帝貌若不慧魏將楊忠門客張子煦見而奇之曰此人虎頭當大貴也永定元

年遷襲封始興郡王文帝嗣位改封安成王天嘉三年自
周還授侍中中書監中衛將軍置佐吏陞位司空尚書令
廢帝即位拜司徒錄尚書都督中外諸軍事光大二年正
月進位太傅領司徒加殊禮劔履上殿十一月甲寅慈訓
太后黜廢帝為臨海王以帝入繼皇統是月齊武成帝殂
太建元年春正月甲午皇帝即位於太極前殿大赦改元
文武賜位一階孝悌力田及為父後者賜爵一級鰥寡不
能自存者人賜穀五斛復太皇太后尊號曰皇太后立妃
柳氏為皇后卅子叔寶為皇太子封皇子江州刺史康樂
侯叔陵為始興王奉昭烈王祀乙未謁太廟丁酉分命大

使觀省四方風俗以尚書僕射沈欽為左僕射度支尚書
王勣為右僕射辛丑祀南郊壬寅封皇子建安侯叔英為
豫章王豐城侯叔堅為長沙王二月乙亥耕藉田夏五月
甲午齊人來聘丁巳以吏部尚書徐陵為尚書右僕射秋
七月辛卯皇太子納妃沈氏王公以下賜帛各有差冬十
月新除左衛將軍歐陽紇據廣州反辛未遣開府儀同三
司章昭達討之

二年春二月癸未章昭達禽歐陽紇送都斬于建康市廣
州平三月丙申皇太后崩丙午曲赦廣衡二州丁未大赦
又詔自討周迪華皎以來兵所有死亡者並令收斂并給

棺槨送還本鄉夏四月乙卯臨海王伯宗薨戊寅皇太后
祔葬于萬安陵五月壬午齊人來弔六月戊子新羅國遣
使朝貢辛卯大雨雹乙巳分遣大使巡州郡省冤屈冬十
一月辛酉高麗國遣使朝貢十二月癸巳雷

三年春正月癸丑以尚書右僕射徐陵為尚書僕射辛酉
祀南郊二月辛巳祀明堂丁酉耕藉田二月丁丑大赦夏
四月壬辰齊人來聘五月辛亥高麗新羅丹丹天竺盤盤
等國並遣使朝貢六月丁亥江陰王蕭季卿以罪免甲辰
封東中郎長沙王府諮議參軍蕭彝為江陰王冬十月乙
酉周人來聘十二月壬辰司空章昭達薨

四年春正月丙午以尚書僕射徐陵為左僕射中書監王
勣為右僕射二月乙酉立皇子叔卿為建安王三月乙丑
扶南林邑國並遣使朝貢夏五月癸卯尚書右僕射王勣
卒是月周人誅冢宰宇文護秋八月辛未周人來聘九月
庚子朔日有蝕之辛亥大赦丙寅以故太尉徐度儀同三
司杜稜程靈洗配食武帝廟庭故司空章昭達配食文帝
廟庭冬十一月己亥地震是歲周建德元年

五年春正月癸酉以吏部尚書沈君理為尚書右僕射領
吏部辛巳祀南郊二月辛丑祀明堂乙卯夜有白氣如虹
自北方貫北斗紫宮三月壬午以開府儀同三司吳明徹

都督征討諸軍事略地北邊丙戌西衡州獻馬生角己丑
皇孫胤生内外文武賜帛各有差為父後者賜爵一級夏
六月癸卯周人來聘秋九月癸未尚書右僕射沈君理卒
壬辰晦夜明冬十月己亥以特進周弘正為尚書右僕射
乙巳吳明徹剋壽陽城斬王琳傳首建鄴梟于朱雀航十
二月壬辰詔熊曇朗留異陳寶應周迪鄧緒等及王琳首
並還親屬以弘廣宥乙巳立皇子叔明為宜都王叔獻為
河東王是歲諸軍略地所在剋捷

六年春正月壬戌赦江右淮北諸州甲申周人來聘高麗
國遣使朝貢二月壬辰朔日有蝕之辛亥耕藉田夏四月

庚子彗星見六月壬辰尚書右僕射周弘正卒冬十一月
乙亥詔北邊行軍之所並給復十年十二月戊戌以吏部
尚書王瑒為尚書右僕射

七年春正月辛未祀南郊三月辛未詔豫二兗譙徐合霍
南司定九州及南豫江郢所部在江北諸郡置雲旗義士
往大軍及諸鎮備防夏四月丙戌有星孛于大角庚寅監
豫州陳桃根獻青牛詔以還百姓乙未桃根又上織成羅
紋錦被表各二詔於雲龍門外焚之壬子郢州獻瑞鍾六
六月丙戌詔為北行將士死王事者剋日舉哀壬辰以尚
書右僕射王瑒為尚書僕射己酉改作雲龍神獸門秋八

月癸卯周人來聘閏九月壬辰都督吳明徹大破齊軍於
呂梁是月甘露頻降樂游苑丁未輿駕幸苑採甘露宴群
臣詔於苑龍舟山立甘露亭冬十月己巳立皇子叔齊為
新蔡王叔文為晉熙王十二月壬戌以尚書僕射王瑒為
左僕射太子詹事陸繕為右僕射甲子南康郡獻瑞鍾一
八年春二月壬申以開府儀同三司吳明徹為司空夏五
月庚寅尚書左僕射王瑒卒六月甲寅以尚書右僕射陸
繕為左僕射新除晉陽太守王克為右僕射秋九月戊戌
立皇子叔彪為淮南王

九年春正月乙亥齊主傳位於其太子恒自號太上皇是

月周滅齊二月壬子耕藉田秋七月己卯百濟國遣使朝貢
庚辰大雨震萬安陵華表己丑震慧日寺刹及瓦官寺重
門一女子震死冬十月戊午司空吳明徹破周將梁士彥
於呂梁十二月戊申東宮成皇太子移于新宮

十年春二月甲子周軍救梁士彥大敗司空吳明徹於呂
梁及將卒皆見囚俘不反三月辛未震武庫丙子分命衆
軍以備周乙酉大赦夏四月庚戌詔絰在軍者並賜爵二
級又詔御府堂署所營造禮樂儀服軍器之外悉皆停息
掖庭常供王侯妃主諸有奉卹者並各量減庚申大雨雹
六月丁酉周武帝崩閏六月丁卯大雨震大皇寺刹莊嚴

寺露盤重陽閣東樓千秋門內槐樹及鴻臚府門秋七月
戊戌新羅國遣使朝貢八月戊寅隕霜殺稻菽九月乙巳
立方明壇于婁湖戊申以楊州刺史始興王叔陵兼王官
伯臨盟甲寅幸婁湖臨誓衆乙卯分遣大使以盟誓班下
四方以上下相警冬十月戊子以尚書左僕射陸繕為尚
書僕射十二月乙亥合州廬江蠻田伯興出寇樅陽刺史
魯廣達討平之是歲周宣政元年

十一年春正月丁酉南兖州言龍見二月癸亥耕藉田秋
七月辛卯初用大貨六銖錢八月丁卯幸大壯觀閱武冬
十月甲戌以尚書僕射陸繕為尚書左僕射以祠部尚書

晉安王伯恭為右僕射十一月辛卯大赦戊戌周將梁士
彥圍壽陽剋之辛亥又剋霍州癸丑以揚州刺史始興王
叔陵為大都督總督水步眾軍十二月乙丑南北充晉三
州及盱台山陽陽平馬頭秦壑陽沛北譙南梁等九郡民
並自拔向建鄴周又剋譙北徐二州自是淮南之地盡歸
于周矣己巳詔非軍國所須多所減損歸于儉約是歲周
宣帝大象元年

十二年夏四月癸亥尚書左僕射陸繕卒己卯大雪壬午
兩五月癸巳以尚書右僕射晉安王伯恭為尚書僕射己
酉周宣帝崩六月壬戌大風吹壞臯門中閤秋八月己未

周鄭州摠管司馬消難以所統九州八鎮之地來降詔因以消難為大都督加司空封隨郡公庚申詔鎮西將軍樊毅進督沔漢諸軍事遣南豫州刺史任忠率衆趨歷陽超武將軍陳慧紀為前軍都督趨南兖州戊辰以司空司馬消難為大都督水陸諸軍事庚午通直散騎常侍淳于陵剋臨江郡癸酉智武將軍魯廣達剋郭默城甲戌大雨霖丙子淳于陵剋祐州城九月癸未周臨江太守劉顯光率衆來降是夜天東南有聲如風水相激三夜乃止丁亥周將王延貴率衆援歷陽任忠擊破之禽延貴等己酉周廣陵義軍主曹藥率衆來降冬十月癸丑大雨震電十二月

庚辰南徐州刺史河東王叔猷薨

十三年春正月壬午以中權將軍護軍將軍鄱陽王伯山
即本號開府儀同三司以尚書僕射晉安王伯恭為左僕
射吏部尚書袁憲為右僕射二月乙亥耕藉田秋九月癸
亥夜大風從西北來發屋拔樹大雨雹冬十月壬寅丹丹
國遣使朝貢十二月辛巳彗星見西南是歲周靜帝大定
元年遜位于隋文帝改元開皇元年

十四年春正月己酉上弗豫甲寅崩于宣福殿時年五十
三遺詔凡厥終制事從省約金銀之飾不以入塋明器皆
用瓦以日易月及公除之制悉依舊準在位百司三日一

臨四方州鎮五等諸侯各守所職並停奔赴二月辛卯群
臣上謚曰孝宣皇帝廟號高宗癸巳葬顯寧陵帝之在田
本有恢弘之度及居尊位寔允天人之屬于時國步初弭
創痍未復淮南之地並入于齊帝志復舊境意反侵地疆
弱之形理則縣絕犯斯不韙適足為禽及周兵滅齊乘勝
而舉略地還至江際自此懼矣既而脩飾都城為扞禦之
備獲銘云二百年後當有癡人脩破吾城者時莫測所從云
後主諱叔寶字元秀小字黃奴宣帝嫡長子也梁承聖二
年十一月戊寅生于江陵明年魏平江陵宣帝遷于長安
留後主於穰城天嘉三年歸建鄴立為安成王世子光大

二年累遷侍中太建元年七月甲午立為皇太子十四年正月甲寅宣帝崩乙卯始興王叔陵構逆伏誅丁巳太子即皇帝位于太極前殿大赦在位文武及孝悌力田為父後者並賜爵一級孤老鰥寡不能自存者賜穀人五斛帛二匹癸亥以待中丹陽尹長沙王叔堅為驃騎將軍開府儀同三司揚州刺史乙丑尊皇后為皇太后丁卯立皇弟叔敦為始興王奉昭烈王祀己巳立妃沈氏為皇后辛未立皇弟叔儼為尋陽王叔慎為岳陽王叔達為義陽王叔熊為巴山王叔虞為武昌王甲戌設無尋大會於太極前殿三月癸亥詔內外衆官九品以上各薦一人又詔求忠

謹無所隱諱己巳以新除翊左將軍永陽王伯智為尚書
僕射夏四月丙申立皇子永康公胤為皇太子賜天下為
父後者爵一級王公以下賚帛各有差庚子詔鏤金銀薄
度物化生土木人綵華之屬及布帛短狹輕疎者並傷財
廢業尤成蠹患又僧尼道士狹邪左道不依經律人間淫
祀祆書諸珍恠事詳為條制並皆禁絕秋七月辛未大赦
是月自建鄴至荊州江水色赤如血八月癸未天有聲如
風水相激乙酉夜又如之九月丙午設無昇大會於太極
前殿捨身及乘輿御服大赦辛亥夜天東北有聲如蟲飛
漸移西北丙寅以驃騎將軍開府儀同三司揚州刺史長

沙王叔堅為司空征南將軍江州刺史豫章王叔英即本
號開府儀同三司

至德元年春正月壬寅大赦改元以江州刺史豫章王叔
英為驃騎將軍開府儀同三司以司空揚州刺史長沙王
叔堅為江州刺史征東將軍開府儀同三司癸卯立皇子
深為始安王秋八月丁卯以驃騎將軍開府儀同三司長
沙王叔堅為司空九月丁巳天東南有聲如蟲飛冬十月
丁酉立皇弟叔平為湘東王叔教為臨賀王叔宣為陽山
王叔穆為西陽王叔儉為南安王叔澄為南郡王叔興為
沅陵王叔韶為樂山王叔純為新興王十二月丙辰頤和

國遣使朝貢司空長沙王叔堅有罪免戊午夜天開自西北至東南其內有青黃雜色隆隆若雷聲

二年春正月丁卯分遣大使巡省風俗癸巳大赦夏五月戊子以吏部尚書江總為尚書僕射秋七月壬午皇太子加元服在位文武賜帛各有差孝悌力田為父後者賜爵一級鰥寡癯老不能自存者人穀五斛冬十一月丙寅大赦是月盤盤百濟國並遣使朝貢

三年春正月戊午朔日有蝕之庚午鎮左將軍長沙王叔堅即本號開府儀同三司三月辛酉前豐州刺史章大寶舉兵反夏四月庚戌豐州義軍主陳景詳斬大寶傳首建

鄴冬十月己丑丹丹國遣使朝貢十一月己未詔脩復仲尼廟辛巳幸長干寺大赦十二月癸卯高麗國遣使朝貢是歲梁明帝殂

四年春正月甲寅詔王公以下各薦所知無隔輿阜二月丙申立皇弟叔謨為巴東王叔顯為臨江王叔坦為新會王叔隆為新寧王夏五月丁巳立皇子莊為會稽王秋九月甲午幸玄武湖肆艦闕武丁未百濟國遣使朝貢冬十月癸亥以尚書僕射江總為尚書令吏部尚書謝朓為尚書僕射十一月己卯大赦

禎明元年春正月戊寅大赦改元乙未地震秋九月庚寅

梁太傅安平王蕭巖荊州刺史蕭瓛遣其都官尚書沈君公詣荊州刺史陳紀請降辛卯巖等帥其文武官男女濟江甲午大赦冬十一月丙子以蕭巖為平東將軍開府儀同三司東揚州刺史丁亥以驃騎大將軍開府儀同三司豫章王叔英為兼司徒十二月丙辰以前鎮衛大將軍開府儀同三司東揚州刺史鄱陽王伯山為鎮衛大將軍開府儀同三司

二年春正月辛巳立皇子恮為東陽王恬為錢唐王夏四月戊申有群鼠無數自蔡洲岸入石頭淮至于青塘兩岸數日自死隨流出江是月郢州南浦水黑如墨五月甲午

東冶鑄鐵有物赤色大如數升自天墜鎔所有聲隆隆如雷鐵飛出牆外燒人家六月戊戌扶南國遣使朝貢庚子廢皇太子胤為吳興王立揚州刺史始安王深為皇太子辛丑以太子詹事表憲為尚書僕射丁巳大風自西北激濤水入石頭城淮渚暴溢漂没舟乘冬十月己亥立皇子藩為吳王己酉幸莫府山大校獵十一月丁卯詔剋日於大政殿詆獄丙子立皇弟叔榮為新昌王叔匡為太原王初隋文帝受周禪甚敦鄰好宣帝尚不禁侵掠太建末隋兵大舉聞宣帝崩乃命班師遣使赴弔修敵國之禮書稱姓名頓首而後主益驕書末云想彼統內如宜此宇宙清

泰隋文帝不說以示朝臣清河公楊素以為主辱再拜請罪及襄邑公賀若弼並奮求致討後副使袁彥聘隋竊圖隋文帝狀以歸後主見之大駭曰吾不欲見此人每遣間諜隋文帝皆給衣馬禮遣以歸後主愈驕不虞外難荒于酒色不恤政事左右嬖佞珥貂者五十人婦人美貌麗服巧態以從者千餘人常使張貴妃孔貴人等八人夾坐江攄孔範等十人預宴號曰狎客先令八婦人襪采箋製五言詩十客一時繼和遲則罰酒君臣酣飲從夕達旦以此為常而盛脩宮室無時休止稅江稅市徵取百端刑罰酷濫牢獄常滿覆舟山及蔣山栢林冬月常多采醴後主以

為甘露之瑞前後災異其多有神自稱老子游於都下與人對語而不見形言吉凶多驗得酒輒醕之經三四年乃去船下有聲云明年亂視之得嬰兒長三尺而無頭蔣山衆鳥鼓兩翼以拊膺曰柰何帝柰何帝又建鄴城無故自壞青龍出建陽門井涌霧赤地生黑白毛大風拔朱雀門臨平湖草舊塞忽然自通後主又夢黃衣圍城乃盡去繞城橘樹又見大蛇中分首尾各走夜中索飲忽變為血有血霑階至於坐牀頭而火起有狐入其牀下捕之不見以為妖乃自賣於佛寺為奴以攘之於郭內大皇佛寺起七層塔未畢火從中起飛至石頭燒死者甚衆又采木湘州

南齊書卷之十
擬造正寢棧至牛渚磯盡沒水中既而漁人見棧浮於海上起齊雲觀國人歌曰齊雲觀寇來無際畔始比齊末諸省官人多稱省主未幾而滅至是舉朝亦有此稱識者以爲省主主將見省之兆隋文帝謂僕射高頴曰我爲百姓父母豈可限一衣帶水不拯之乎命大作戰船人請密之隋文帝曰吾將顯行天誅何密之有使投楫於江若彼能改吾又何求及納梁蕭瑀蕭巖隋文愈忿以晉王廣爲元帥督八十摠管致討乃送璽書暴後主二十惡又散寫詔書書三十萬紙徧喻江外諸軍旣下江濱鎮戍相繼奏聞新除湘州刺史施文慶中書舍人沈客卿掌機密並抑而

不言初蕭巖蕭瓛之至也德教學士沈君道夢殿前長人
朱衣武冠頭出欄上攘臂怒曰那忽受叛蕭誤人事後主
聞之忌二蕭故遠散其衆以巖為東揚州刺史瓛為吳州
刺史使領軍任忠出守吳興郡以襟帶二州使南平王嶷
鎮江州永嘉王彥鎮南徐州尋召二王赴期明年元會命
緣江諸防船艦悉從二王還都為威勢以示梁人之來者
由是江中無一鬪船上流諸州兵皆阻楊素軍不得至都
下甲士尚十餘萬人及聞隋軍臨江後主曰王氣在此齊
兵三度來周兵再度至無不摧沒虜今來者必自敗孔範
無度江理但奏伎縱酒作詩不輟

三年春正月乙丑朔朝會大霧四塞入人鼻皆辛酉後主
昏睡至晡時乃罷是日隋將賀若弼自北道廣陵濟韓擒
趨橫江濟分兵晨襲採石取之進拔姑熟次於新林時弼
攻下京口緣江諸戍望風盡走弼分兵斷曲阿之衝而入
丙寅採石戍主徐子建至告變戊辰乃下詔曰犬羊陵縱
侵竊郊畿蠶蠶有毒宜時埽定朕當親御六師廓清八表
內外並可戒嚴於是以蕭摩訶為皇畿大都督樊猛為上
流大都督樊毅為下流大都督司馬消難施文慶並為大
監軍重立賞格分兵鎮守要害僧尼道士盡免執役庚午
賀若弼攻陷南徐州辛未韓擒又陷南豫州隋軍南北道

並進辛巳賀若弼進軍鍾山頓白土岡之東南衆軍敗績
弼乘勝進軍宮城燒北掖門是時韓擒率衆自新林至石
子岡鎮東大將軍任忠出降擒仍引擒經朱雀航趣宮城
自南掖門入城內文武百司皆遁出唯尚書僕射袁憲後
閣舍人夏侯公韻侍側憲勸端坐殿上正色以待之後主
曰鋒刃之下未可及當畧自有計乃逃於井二人苦諫不
從以身蔽井後主與爭久之方得入沈后居處如常太子
深年十五閉閣而坐舍人孔伯魚侍焉戍士叩閣而入深
安坐勞之曰戎旅在塗不至勞也旣而軍人窺井而呼之
後主不應欲下石乃聞叫聲以繩引之驚其太重及出乃

與張貴妃孔貴人三人同乘而上隋文帝聞之大驚開府
鮑宏曰東井上於天文為秦今王都所在投井其天意邪
先是江東謠多唱王獻之桃葉辭云桃葉復桃葉度江不
用楫但度無所苦我自接迎汝及晉王廣入據臺城送後主
山名桃葉果乘陳船而度丙戌晉王廣入據臺城送後主
于東宮三月己巳後主與王公百司同發自建鄴之長安
隋文帝權分京城人宅以俟內外脩整遣使迎勞之陳人
謳詠忘其亡焉使還奏言自後主以下大小在路五百里
纍纍不絕隋文帝嗟歎曰一至於此及至京師列陳之輿
服器物於庭引後主於前及前後二太子諸父諸弟衆子

之為王者凡二十八人司空司馬消難尚書令江總僕射
表憲驃騎蕭摩訶護軍樊毅中領軍魚鱗達鎮軍將軍任
忠吏部尚書姚察侍中中書令蔡徵左衛將軍樊猛自尚
書郎以上二百餘人文帝使納言宣詔勞之次使內史令
宣詔讓後主後主伏地屏息不能對乃見宥隋文帝詔陳
武文宣三帝陵塹給五戶分守之初武帝始即位其夜奉
朝請史普直宿省夢有人自天而下導從數十至太極殿
前北面執玉策金字曰陳氏五帝三十二年及後主在東
宮時有婦人突入唱曰畢國主有鳥一足集其殿庭以觜
畫地成文曰獨足上高臺盛草變為灰欲知我家處朱門

當水開解者以為獨足蓋指後主獨行無衆盛草言荒穢
隋承火運草得火而灰及至京師與其家屬館於都水臺
所謂上高臺當水也其言皆驗或言後主名叔寶反語為
少福亦敗亡之徵云既見宥隋文帝給賜甚厚數得引見
班同三品每預宴恐致傷心為不奏吳音後監守者奏言
叔寶云既無秩位每預朝集願得一官號隋文帝曰叔寶
全無心肝監者又言叔寶常耽醉罕有醒時隋文帝使節
其酒既而曰任其性不爾何以過日未幾帝又問監者叔
寶所嗜對曰嗜驢肉問飲酒多少對曰與其子弟日飲一
石隋文帝大驚及從東巡登芒山侍飲賦詩曰日月光天

德山川壯帝居太平無以報願上東封書并表請封禪隋文帝優詔謙讓不許後從至仁壽宮常侍宴及出隋文帝目之曰此敗豈不由酒將作詩功夫何如思安時事當賀若弼度京口被人密啓告急叔寶為飲酒遂不省之高頻至日猶見啓在牀下未開封此亦是可笑蓋天亡也昔符氏所征得國皆榮貴其主苟欲求名不知違天命與之官乃違天也隋文帝以陳氏子弟既多恐京下為過皆分置諸州縣每歲賜以衣服以安全之後主以隋仁壽四年十一月壬子終於洛陽時年五十二贈大將軍封長城縣公謚曰煬葬河南洛陽之芒山

論曰陳宣帝器度弘厚有人君之量文帝知冢嗣仁弱早存太伯之心及乎弗念咸已委託矣至於續業之後拓土開疆蓋德不逮文智不及武志大不已晚致呂梁之敗江左日蹙抑此之由也後主因削弱之餘鍾滅亡之運刑政不樹加以荒淫夫以三代之隆歷世數十及其亡也皆敗於婦人況以區區之陳外鄰明德覆軍之跡尚且追蹤叔季其獲支數年亦爲幸也雖忠義感慨致慟并隅何救麥秀之深悲適足取笑乎千祀嗟乎始梁末童謠云可憐巴馬子一日行千里不見馬上郎但見黃塵起黃塵汗人衣皁莢相料理及僧辯滅群臣以謠言奏聞曰僧辯本乘巴

馬以擊侯景馬上郎王字也塵謂陳也而不解阜英之謂
既而陳滅於隋說者以為江東謂殺羊角為阜英隋氏姓
楊楊羊也言終滅於隋然則興亡之兆蓋有數云

陳本紀下第十

南史十

